




జ్యోతి కృష్ణారావు

శుద్ధాది విశ్వనాథ రాయ



శుద్ధాది విశ్వనాథ రాయ కృష్ణారావు అకాడమి

జ్యోతి గాధ కృష్ణారావులు

'TULU SHORT STORIES FOR CHILDREN' SERIES

'JOGI PURUSER' by Sri Kudkady Vishwanatha Rai


Published by Karnataka Tulu Sahitya Academy, Corporation Building, Lalbhag, Mangalore - 575003.

ಪ್ರಥಮ ಮುದ್ರಣ	:	1998	BVP-1681 10/10/12 G-2840 80/84.
ಬೆಲೆ	:	ರೂ. 15	
ಪುಟಗಳು	:	28	
ಪ್ರಧಾನ ಸಂಪಾದಕ	:	ಡಾ. ಬಿ.ಎ. ವಿವೇಕ ರೈ ಅಧ್ಯಕ್ಷರು ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ	
ಪ್ರಕಾಶಕರು	:	ಡಾ. ಪಾಲ್ವಾಡಿ ರಾಮಕೃಷ್ಣ ಆಚಾರ್ ರಿಜಿಸ್ಟ್ರಾರ್ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ	
ಹಕ್ಕುಗಳು	:	ಅಕಾಡೆಮಿ	
ಅಕ್ಷರ ಸಂಯೋಜನೆ	:	ಆಕೃತಿ ಕಂಪ್ಯೂಟರ್ಸ್, ಮೈದಾನ 4ನೇ ಅಡ್ಡರಸ್ತೆ, ಮಂಗಳೂರು - 575001	
ಮುದ್ರಣ	:	ಪ್ರಕಾಶ್ ಆಫ್‌ಸೆಟ್ ಪ್ರಿಂಟರ್ಸ್, ಬೈಕಂಪಾಡಿ ಕೈಗಾರಿಕಾ ಪ್ರದೇಶ, ನವ ಮಂಗಳೂರು - 575010	

ಜೋಕುಲೆಗಾದ್ ತುಳು ಕತೆಕುಲು - 13

ಜೋಗಿ ಪುರುಸೆರ್

ಕುದ್ಯಾಡಿ ವಿಶ್ವನಾಥ ರೈ



ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿ

ಲಾಲ್‌ಬಾಗ್, ಮಂಗಳೂರು - 575003.

ಅಧ್ಯಕ್ಷರೇನ ಮದಿಪು

ತುಳುನಾಡ್ಡ್ ಪ್ರಾಕ್ಡ್ಡಿಂಚಿ ನಮ್ಮ ಹಿರಿಯಾಕುಲು ಪಂಡೊಂದು ಬತ್ತಿಂಚಿ ಅಚ್ಚಿ ಕತೆಕುಲು, ಪಾಡ್ಡನದ ಕತೆಕುಲು ಒಂಜಿ ಕಾಲೊಡು ನಮ್ಮ ತುಳುವೆರೆಗ್ ಅಕ್ಲ್ ಚರಿತ್ರನ್ ತೆರಿಪಾಯಿನ ಕಲ್ಪಾಯಿನ ವಿದ್ಯೆಲು. ಕೋಟಿ ಚೆನ್ನಯೆರ್, ಸಿರಿ, ಅಬ್ಬಗೆ ದಾರಗೆ, ದೇವು ಪೊಂಜೆ, ಅಗೋಳಿ ಮಂಜಣೆ, ಪುಳ್ಳೂರು ಬಾಚೆ, ಪರತಿ ಮಂಗಣೆ ಇಂಚಿ ಏತೇತೋ ಆಂಜೊವು ಪೊಂಜೊವೆಲೆನ ಪುದರ್ಲೆನ್ ಕತೆಕೆಲೆನ್ ನಮ್ಮ ಹಿರಿಯಾಕುಲು ಕೇಂಡೊಂದು ಕಲ್ತೊಂದು ಮಲ್ಲೆ ಆತೆರ್. ಒಂಜಿ ಕಾಲದ ಅಚ್ಚಿ ಅಚ್ಚೆರ್ನುಕುಲು ಪುಳ್ಳೆಲ್ಲ್ಗೆ ಪನೊಂದಿತ್ತಿನ ಕತೆಕ್ಲೆಡ್ ಕುಸಾಲ್ ಇತ್ತಂಡ್, ಕುಸೆಲ್ ಇತ್ತಂಡ್. ಕನಕಟ್ಟುನ, ಗೇನ ಪುಟ್ಟಾವುನ ಶಕ್ತಿ ಇತ್ತಂಡ್. ತೆಲ್ತ್ ತೆಲ್ತ್ದ್ ಬಂಜಿ ಉರ್ಕಾವುನ ಉಲ್ಲಾಸ ಇತ್ತಂಡ್. ಇಂಚಿ ತೆಲಿಪುನ ಯೋಚನೆ ಮಲ್ಪುನ ಪೊಸ ಲೋಕೊಗು ಪೋಪುನ, ಪೊಸ ಸಾದಿ ಪತ್ತುನ, ಪೊಸ ವಿದ್ಯೆಲೆನ್ ತುಳುವೆರ್ ಕಲ್ತ್ದಾನೆ ಅಕ್ಲೆನ ಅಚ್ಚಿ ಕತೆಕ್ಲೆಡ್ ಇಂಚಿತ್ತಿ ಅಚ್ಚಿ ಕತೆಕ್ಲೆ, ಪಾಡ್ಡನದ ಕತೆಕ್ಲೆ ರುಚಿನ್ ನಮ್ಮ ಪೊಸ ಕಾಲದ ತುಳುವ ಜೋಕ್ಲೆಗ್ ಪುಟ್ಟವೊಡು ಪನ್ನಿ ಆಸೆ ಕರ್ನಾಟಕ ತುಳು ಸಾಹಿತ್ಯ ಅಕಾಡೆಮಿದವು. ಅಂಚಾದ್ ಈ 20 ತುಳು ಕತೆ ಬೂಕುಲೆನ್ ತುಳು ಸಾಹಿತಿಲೆಡ ಬರೆಪಾದ್ ಕತೆಕೆಲೆಗ್ ಬೋಡಾಪಿನ ಚಿತ್ರೊಲೆನ್ ಸೇರ್ಪಾದ್ ಬೂಕುಲೆ ಮೋನೆಲೆಗ್ ರಂಗ್ ಪಾಡ್ಪಾದ್ ತುಳು ಜೋಕುಲೆ ಮಟ್ಟೆಲ್ಗ್ ಪಾಡೊಂದುಂಡು.

ತುಳು ಸಾಹಿತ್ಯ ಅಕಾಡೆಮಿ 1994ಟ್ ಈ ಕತೆ ಬೂಕುಲೆನ್ ಬರೆಪವುನ ಯೋಚನೆ ಮಲ್ತ್ದ್ ದಕ್ಷಿಣ ಕನ್ನಡ ಜಿಲ್ಲಾ ಪಂಚಾಯತ್‌ದೊಟ್ಟಿಗೆ ಸೇರ್ಪಾದ್ ಅಚ್ಚಿ ಮಲ್ಪುನ ಯೋಜನೆ ಇತ್ತಂಡ್. 20 ಜನ ಸಾಹಿತಿಲೆಕುಲು ಅಕಾಡೆಮಿಡ್ ಸೇರ್ಪ್ ಚರ್ಚೆ ಮಲ್ತ್ದ್ ಈ ಬೂಕುಲೆನ್ ಬರೆದ್ ಕೊರ್ಪೆರ್. ಬೇತೆ ಬೇತೆ ಕಲಾವಿದೆರ್ನುಕುಲು ಈ ಬೂಕುಲ್ ಮೋನೆದ ಚಿತ್ರೊಲೆನ್ ಉಳಯಿದ ಚಿತ್ರೊಲೆನ್ ಬರೆದ್ ಕೊರ್ಪೆರ್. ಆಂಡ 1995ಟ್ ತುಳು ಸಾಹಿತ್ಯ ಅಕಾಡೆಮಿ ಅಸ್ತಿತ್ವೊಡು ಇಜ್ಜಂದಿನೆಡ್ಡಾದ್ಲಾ, 1996ಟ್ ಅಕಾಡೆಮಿಗ್ ಪೊಸ ಜುವ ಕೊರ್ನಗ ಜಿಲ್ಲಾ ಪಂಚಾಯತ್‌ದ ಯೋಜನೆ ಉಂತುದು ಪೋಯಿನೆಡ್ಡಾದ್ಲಾ ಬೊಕ್ಕ ಅಕಾಡೆಮಿದ ಪಣವುದ ತಾಪತ್ರಯೊಲೆಡ್ಡಾದ್ಲಾ ಈ 20 ಬೂಕುಲೆನ್ ಅಚ್ಚಿ ಮಲ್ಪುನ ಕೆಲಸೊ ದುಂಬು ದುಂಬೆ ಪೋಂಡು. ಆಂಡ ಇತ್ತೆ ಎಂಚಲಾ ಮನಸ್ ಮಲ್ತ್ದ್ ಈ ಎಡ್ಡೆ ಕೆಲಸೊನು ಕೋಡಿ ಎತ್ತವೊಡುಂದು ತುಳು ಸಾಹಿತ್ಯ ಅಕಾಡೆಮಿ ಈ 20 ಬೂಕುಲೆನ್ ಅಚ್ಚಿ ಮಲ್ತೊಂದುಂಡು.

ಈ ಬೂಕುಲೆನ್ ಬರೆದ್ ಕೊರ್ಪುನ ಮಾತ ತುಳು ಸಾಹಿತಿಲೆನ್ಲಾ, ಅವೆಕ್ ಚಿತ್ರ ಬರೆದ್ ಕೊರ್ಪಿ ಕಲಾವಿದೆರೆನ್ಲಾ ಅಕಾಡೆಮಿ ಮೋಕೆಡ್ ನೆನೆತೊಂದುಂಡು. ಉಂದೆಟ್ಲಾ ಜೋಗಿ ಪುರುಸೆರ್ ಕತೆ ಬೂಕುನು ಪೊರ್ಲುಡು ಮೊಡೆದ್ ಕೊರಿನ ಕುದ್ಕಾಡಿ ವಿಶ್ವನಾಥ ರೈ ಮೆರೆಗ್ ಅಕಾಡೆಮಿದ ಪುದರ್ಲೆಡ್ ಸೊಲ್ಮೆ ಸಂದಾವೊಂದುಲ್ಲೆ. ಈ ಬೂಕುಗು ಅಕ್ಷರ ಜೋಡಣೆ ಮಲ್ತ್ ಕೊರಿನ ಆಕೃತಿ ಕಂಪ್ಯೂಟರ್‌ಸದ ಕಲ್ಲೂರು ನಾಗೇಶ್ ಬೊಕ್ಕ ನಳಿನಿ ಸುವರ್ಣ ಮೊಕ್ಲೆಗ್ಲಾ, ಕಡಮೆ ಕಾಲೊಡು ಪೊರ್ಲು ಪೊಲಿಗ್ಡ್ ಅಚ್ಚಿ ಮಲ್ತ್ ಕೊರಿನ ಪ್ರಕಾಶ್ ಆಫ್‌ಸೆಟ್ ಬೈಕಂಪಾಡಿ ಇಂದೆತ್ತ ದಿನಿ ಕೆ.ಎಂ. ಶಂಕರ ಪ್ರಭು, ಬೊಕ್ಕ ಬಳಗೊದಕುಲೆನ ಸಹಾಯೊನು ಅಕಾಡೆಮಿ ಏಪಲಾ ನೆನೆತೊನುಂಡು.

ಮಂಗಳೂರು

20.5.1998

ಪ್ರೊ. ಬಿ.ಎ. ವಿವೇಕ ರೈ

ಜೋಗಿ ಪುರುಷರೆ ಕತೆ

ಕವುರವರೆಗ್ ಪಾಂಡವರೆಗ್ ಪಗಡೆ ಗೊಬ್ಬು ನಡತಾಂಡ್. ಪಾಂಡವರೆಗ್ ಸೋಲು ತಾಗ್‌ದ್ ಪದಾರಾಡ್ ಒರಸೊ ವನವಾಸೊ ಮಲ್ತೆರ್. ಒಂಜಿ ಒರಸೊ ಅಜ್‌ನಾತ ವಾಸೊ ಕರಿಯರ ವಿರಾಟರಾಯನ ರಾಜ್ಯೊಗು ಬತ್ತೆರ್. ಬ್ರಾಣ ವೇಸೊಡು ಬತ್ತಾದ್ ಕೇಂಡೆರ್. ಎಂಕಲೆಗ್ ಬೆನನಾತ್ ಬೇಲೆ ಕೊರೊಡುಂದು ಕೇಂಡೆರ್.

ವಿರಾಟರಾಯೆ ಪನ್ನೆ "ಬೆನನಾತ್ ಬೇಲೆ ಉಂಡು. ಎಂಕಲೆಗ್ ಬೇಲೆಗ್ ಜನೊ ಸಿಕ್ಕುಬಿ" ದರಾಮ ರಾಯೆರೆಗ್ ಬರವುತ ಐಗುಲೆ ಕೆಲಸೊ ಕೊರಿಯೆ. ಬೀಮಗ್ ಅಟ್ಟಿಲ್ ಅರಗಣೆದ ಕೆಲಸೊ, ಅರ್‌ಜುನಗ್ ಬಾರೆತ ಬಿತ್‌ಲ್ ಕಾಪುನ ಕೆಲಸೊ, ಬುಕ್ಕೊ ನಲಿಕೆ ಕಲ್‌ಪಾಪುನ ಕೆಲಸೊ ಕೊರ್ತೆ. ನಕುಲಗ್ ಸಹದೇವಗ್ ಕಯ್‌ಕಂಜಿ ಮೇಪಿ ಬೇಲೆ ಕೊರ್ತೆ. ಕುಂತಿಗ್ ಎರ್ಮ್ ಪೆತ್ತ ಬೊರಿಯರ ಕೊರಿಯೆ. ಕನ್ನೆ ದುರುಪತಿಗ್ ಪೂತ ಬಿತ್‌ಲ್‌ಗ್ ನೀರ್ ಮಯಿಪಿ ಬೇಲೆ ಕೊರಿಯೆ.

ತೋಡ್‌ದಿನ ಗುವೆಲ್‌ನವು ಪಾಡ್‌ದಿನ ಪನೆ ಇತ್ತಾಂಡ್. ಪಾತಾಲೊದ ನೀರ್‌ನ್ ಪನೆಟ್ ಉಂತಾದ್ ದುರುಪತಿ ಪಾಡೊಂದ್ ಇತ್ತಲ್. ಇಪ್ಪುನಗ ಅಜಿಪತ್ತ ಆಜಿ ಗರಡಿದ ಕೀಚಕ ಅರಸು ಈಂದ್ ಈಚಿಲ್ ಮೂರ್ಟೆಗ್ ಬರ್‌ಪೆ. ಬೊಲ್ಲಿದ ತರ್‌ಕತ್ತಿ ಬಂಗರಾನ್ ಅಂಡೆನೆ

ಪತೊಂದ್ ಬರ್ ಪೆ - ಬತ್ ದ್ ಮೂರೊಂದು ಇಪ್ಪುನಗ, ಆಕಾಸೊ ಅರಲುಂಡು. ಬೂಮಿ ಬೆಳಗುಂಡು. ಅಚ್ಚಿರೊಟು ನಾಲ್ ದಿಕ್ಕ್ ನಾಲ್ ಊರು ತೂಯೆ. ತಿರ್ತ್ ತೂನಗ ಸೆಡಿಲ್ ಮೆಂಚಿ ಹಾಕಿನ ಲೆಕ್ಕ ಆಪುಂಡು.

ಕನ್ನೆ ದುರುಪತಿ ನೀರ್ ಮಯಿಪುನ ಪೊರ್ಲು ತೂಯೆ. ದರ್ರಂದ್ ಜಾರೊಂದ್ ತಿರ್ತ್ ಬತ್ತೆ. ಅಡ್ಡ ಕಟ್ವಾದ್ ಉಂತ್ ದ್ ಕೇಂಡೆ.

"ಪೊನ್ನೆ ನಿನ್ನ ಅಪ್ಪೆ ಅಮ್ಮೆ ಏರ್?"

"ನಿಕ್ಕೊ ಓಲಾಂಡ್?"

"ಇಪ್ಪುನಿ ಓಲು?" ಕೇಂಡೆ.

"ಕೀಚಕರಸು ಈಯಾಂಡ ಮೂರರೆ ಬತ್ತಿನಾಯೆ. ಮೂರೊಂದು ಪೋಲ. ಎನ್ನ ಅಪ್ಪೆ ಅಮ್ಮನ ಸುದ್ದಿ ನಿಕ್ಕೊ ಬೊಡ್ಡಿ. ಯಾನಾಂಡ ಓಲ್ ಇತ್ತೆಡ ನಿಕ್ಕೊ ದಾಯೆಗ್?" ಎಂದ್ ಪಂಡಲ್

ಅಯಿಕ್ "ಎಲ್ಲೆ ಅಂಗಾರೆ ಅತ್ತ ಮಿತ್ತ ಅಂಗಾರೆ ಎನ್ನನೆ ಸಾದನೆದ ಗರಡಿಗ್ ಬರೊಡು. ಬರ್ಪಂಡ ಬರ್ಪೆಂದ್ ಪನ್ಲ. ಬರ್ಪುಜಡ ಬರ್ಪುಜಿಂದ್ ಪನ್ ಪೊನ್ನೆ" ಪಂಡೆ.

"ಏರೆ ಸುದ್ದಿಗ್ ಪೋಪಡಲ ಪೋಲ, ಎನ್ನ ಸುದ್ದಿಗ್ ಬರಡ. ಎನ್ನ ಸುದ್ದಿ - ಪಂಚ ಪಾಂಡವೆರೆ ಸುದ್ದಿ ನಿಕ್ಕೊ ಬೊಡ್ಡಿ. ಸುಡು ಸೂಕರ ಆವು. ಎನ್ನ ಮಿತ್ತ ಕಯ್ ಮಲ್ತಿನಾಯೆ ಬೂಮಿದ ಮಿತ್ತ ಇದ ಮುಟ್ಟು ಇದ್ದಿಯೆ. ನನ ಪುಟ್ಟರೆಲಾ ಇದ್ದಿ ತೂಲ" ಪನ್ನಗ....

"ಬರ್ಪಡ ಬರ್ಪೆಂದ್ ಪನ್ನ. ಬರ್ಪುಜಡ ಬೊಲ್ಲಿ ತರ್ಕತ್ತಿಡ್ ಮೂಜಿ ತುಂಡು ಪಾರಾವಂದೆ ಬುಡಯೆ" ಪಂಡೆ. ಪೊನ್ನ ಪೊಂಜೊವು ಪೋಡಿತ್ ಬರ್ಪೆಂದ್ ಪಂಡಲ್.

"ಬಾಯಿಡ್ ಈಯಿ ಬರ್ಪೆಂದ್ ಯಾವಂದ್. ಕಯ್ ಬೊಟ್ಟು ಕಯ್ ಬಾಸೆ ಕೊರೊಡು. ಬೂಮಿ ಮುಟ್ ದ್ ಬೂಮಿ ಸಾಕಿ ಕೊರೊಡು. ಮಿತ್ತ ತೂದು ನಾರಾಯಣ ದೇವೆರೆ ಸಾಕಿ ಕೊರೊಡು. ಮರಕ್ ಗಡಿ ದೀವೊಡು" ಪಂಡೆ.

ಮರಕ್ ಗಡಿ ದೀಡಿಯಲ್. ಕಯ್ ಬೊಟ್ಟುದು ಕಯ್ ಬಾಸೆ ಕೊರಿಯಲ್. ಬೂಮಿ ಮುಟ್ ದ್ ಬೂಮಿ ಸಾಕಿ ಕೊರಿಯಲ್. ಮಿತ್ ತೂದ್ ನಾರಾಯಣ ದೇವೆರೆ ಸಾಕಿ ಕೊರಿಯಲ್.

ಒಂಜಿ ಕಂದೆಲ್ ನೀರ್ ಪತೊಂದ್ ಪೂತ ಬಿತ್ತಲ್‌ಗ್ ಪೋಯಲ್. ಪೂಗು ನೀರ್ ಮಯಾತಲ್. ಇಲ್ಲಡೆಗ್ ಪೋಯಲ್. ಕತ್ತಲೆದ ಕೋನೆಡ್ - ದುಕ್ಕೊದ ಕೋನೆಡ್ ಜೆತ್ತಲ್. ಕಲ್ಲಕಲೆಂಬಿಡ್ ಕಂಕನೆ ಕಬ್ಬಿ ಜೆತ್ತಲ್. ಉಣಿಯರೆ ಲಕ್ಕಜಲ್. ಪೂತ ಬಿತ್ತಲ್‌ಗ್ ನೀರ್ ಮಯಿಪುಜಲ್.

ದರ್ಮ ರಾಯೆರ್ ಬತ್ತರ್ "ಪೊನ್ನೇ ಪೂತ ಬಿತ್ತಲ್‌ಗ್ ನೀರಾಂಡ ದಾನೆ ಮಯಿಪುಜ? ಉಣಿಯರೆ ದಾನೆ ಲಕ್ಕಜ?" ಕೇಂಡೆರ್. "ಆಣ್‌ಜೊವೆ, ಇನಿ ಮುಟ್ಟು ನಿಕ್‌ಲೆಗ್ ಐವರೆಗ್ ಒರ್ತಿ ಯಾನ್ ಇತ್ತೆ. ಇನಿ ಎಂಕ್ ಕೀಚಕ ದಿಕ್ಕೆದ ಬೊನ್ನೊ ಗೋರು ಕಾಲೊ ಬತ್ತಂಡ್" ನಡತಿ ಸಂಗತಿ ಪಂಡಲ್.

"ಕೀಚಕ ಅರಸು ಪಂಡ ಸಾಮಾನ್ಯದ ಜನೊ ಅತ್ತ್. ನೂತ್ತ ಒಂಜಿ ಪೊನ್ನು ಆನೆದ ತಾಕತ್ತದಾಯೆ. ಆಯಗ್ ಎದ್‌ರಾದ್ ಉಂತರೆ ಎನ್‌ಡ್‌ಡ್ ಆಪಂದ್. ಎನಡ ದಾನೆ ಪನ್ನುನೆ? ಎನ್ನ ಮೆಗಿಯಲ್ಲು ಉಲ್ಲೆರ್. ಅಕ್‌ಲೆಡ ಪನ್ನ ಪೋಲ" ಪಂಡೆ.

ನಕುಲ ಸಾದೇವರೆಡ ಪನ್ನಗ "ಎಂಕುಲೆ ಪಲಯಲ್ಲು ಉಲ್ಲೆರ್ ಅಕ್‌ಲೆಡ ಪನ್ನ" ಪಂಡೆರ್. ಅರ್ಜುನಡ ಪನ್ನಗ, ಆಯೆ ಪನ್ನೆ "ಎನಡ್‌ತ್ ಆಪಿ ಕೆಲಸೊ ಅತ್ತ್. ಎಂಕಲೆ ಭೀಮಸೇನೆ ಉಲ್ಲೆ. ಆಯಡ ಪನ್ನ. ನೂತ ಒಂಜಿ ಆನೆಲೆ ಸಕ್ತಿದಾಯೆ. ಆಯಡ ಪಂಡ ನಿನ್ನ ಕಸ್ಸೊ ಪರ್ಯಾರ ಆವು" ಪಂಡೆ.

"ಆನ್ ಆಂಜೊವು ನಿದ್ರೆ ನಿಮನೊಡು ಇಪ್ಪುನಗ ಲಕ್ಕವುನ ಕುಸೆಲೆಂಚ ?"

"ನಾಗದರ್ಬೆ ಸಿರಿಗಿಂಡೆದ ನೀರ್ ಪತೊಂದು ಪೋಲ. ಬಲತ ಕಾರ ಮಿನ ಪೊಟ್ಟೆಗ್ ಪೊಯ್ ಪಾಡ್‌ದ್ ಮೆನಿಪುಲ ಪೊನ್ನೆ" ಪಂಡೆ. ಸಿರಿಗಿಂಡೆದ ನೀರ್ ಪತೊಂಡಲ್. ನಾಗದರ್ಬೆ ಪತೊಂಡಲ್. ಬಲತ ಕಾರ್‌ದ ಮಿನ ಪೊಟ್ಟೆಗ್ ಪೊಯ್ ಪಾಡ್‌ದ್ ಮೆನಿತಲ್.

ಬೀಮೆ ಲಕ್ಕದ್ ಕುಲ್ಲಾನಗ ಏಳ್ ಕೋಲ್ ನೆಲ ಅದ್‌ರಾಂಡ್. ನಾಲ್ ಮೂಲೆಗ್ ತೂನಗ ಕತ್ತಲೆಡ್ ದುರುಪತಿ ಉಂತನೆನ್ ತೂಪೆ. ಲಕ್ಕದ್ ಒಂಜಿ ಕಯ್ ಜುಟ್ಟುಗು ಕೊರಿಯೆ. ಒಂಜಿ ಕಯ್ ಪಾಂಡಲ ಕತ್ತಿಗ್ ಕೊರಿಯೆ. ದ್ರ, ಒಯ್ತೊಂದು ಬತ್ತೆ. "ಈತ್ ಮದೊ ಅಂಕಾರೊದ ಪೊನ್ನನ್ ಬೂಮಿದ ಮಿತ್ತ್ ದೀವಯೆ" ಪಂಡ್‌ದ್ ಪಾಂಡಲ ಕತ್ತಿ ಬೇರಿಯೆ.

"ಆಣ್‌ಜೊವೆ, ಎಮೆ ಆಂಡಲ ಬತ್ತದ್ ಮೂಜಿ ಪಾತೆರೊ ಕೇನ್ನ ಮುಟ್ಟು ಉಂತುವೆ. ಈರೆಗ್ ಆತಲಾ ಪುರುಸೊತ್ತು ಇದ್ದಿಯೊ?" ಪನ್ನಗ ಪಾಂಡಲ ಕತ್ತಿ ತಿರ್ತ್ ದೀಡಿಯೆ. ಜುಟ್ಟುದ ಕಯ್ ಬುಡಿಯೆ.

"ಪೊನ್ನೆ ಎಂಕ್‌ಲೊ ಐಯ್ಯಲೆರ್ ಪಾಂಡವೆರ್ ಇಪ್ಪುನಗ ನಿಕ್ಕ ಬತ್ತಿನ ಕಸ್ತೊ ದಾನೆ? ಬೇಕೊ ಪನ್" ಪನ್ನಗ, ನಡತಿ ಸಂಗತಿ ಪನ್ನಲ್.

"ಇನಿ ಮುಟ್ಟು ಐಯ್ಯೆರೆಗ್ ಯಾನ್ ಒರ್ತಿಯಾಂಡಲ ಇತ್ತೆ. ಇನಿ ಕೀಚಕ ಅರಸುನ ದಿಕ್ಕಿಲ್‌ದ ಬೊನ್ನೊ ಕೋರುನ ಕಾಲೊ ಬತ್ತಂಡ್" ಪಂಡಲ್. ನಡತಿ ಸಂಗತಿ ಕೇಂಡ್‌ದ್ ಬೀಮೆ ಏಳೇಲ್ ಲೋಕೊದ ಕೋಪೊಡು ಗೆಂಡಾಯೆ. ಆಕಸೊಗು ಬೂಮಿಗ್ ಸಮನಾದ್ ಉಂತಿಯೆ.

"ಈರ್ ಪೋಪರಾಂಡ ಪೋಲೆ. ಇದ್ಯೆಂಟ ಈರೆನ ದುತ್ತು ಐತೊ ಎಂಕ್ ಕೊರಲೆ. ಯಾನ್ ಪೋಪೆ" ಪಂಡಲ್.

"ಪೊನ್ನೆ, ಎಂಕ್‌ಲೊ ಐನ್ ಜನೊ ಪಾಂಡವೆರ್ ಇಪ್ಪುನಗ ಈಯಿ ಪೊನ್ನು ಪೊಂಜೊವು ದಾಯೆ ಪೋವೊಡು? ಎನ್ನ ತರೆ ಬಾರ್‌ದ್ ಕಟ್ವಾಲ" ಪಂಡೆ. ಬೊಲ್ಲಿದ ಬರ್ಚನೆ ಪತೊಂದು ಬತ್ತಲ್. ಎಣ್ಣೆದ ಅರಿಯ ಕೊಂಡತ್ ಪದೆಪುಗು ಎಣ್ಣೆ ಪಾಡ್‌ದ್ ಜಡೆಗೊಂಡೆ ರಂಡೆ ಸೂಡಿ ಪಾಡಿಯಲ್. ಮುಂಡೊಗು ಪನಿ ಕುಂಕುವೊ ದೀಡಿಯಲ್. ಕಣ್ಣ್‌ಗ್ ಕೋಲ್ ಮಯಿ ಒಯ್ತಲ್. ಪಟ್ಟೆ ಸೀರೆ ತುತ್ತಾಯಲ್. ಪಟ್ಟೆ ರವಕೆ ಪಾಡಿಯಲ್. ಕಾರ್‌ಗ್ ಸಿರಿ ಗೆಜ್ಜೆ ಕಟ್ಟಿಯಲ್. ನೆತ್ತಿಗ್ ನೆತ್ತಿ ಬಗ್ತಲೆ ದೀತಾಂಡ್. ಪಾಂಡಲ ಕತ್ತಿ ದೆತ್ತದ್ ಸೊಂಟೊಗು ಬಿಗಿತೊಂಡೆ. ಗದೆನ್ ದೆತ್ತದ್ ಕಿದಿಕ್ಕಲಡಿ ಬಿಗಿತೊಂಡೆ. ಆತ್ ಪೂರ್ತುಗು ಪದಿನೆನ್ನೊ ಒರ್ಸೊದ ಪೊನ್ನಾದ್ ಉಂತಿಯೆ.

ಎಡ್ಡೆ ಪೂರ್ತುಗು ಪಿದಡೊನುದು ಕೀಚಕನ ಸಾದನೆದ ಗರಡಿಗ್ ಪೋಪೆ. ಕೀಚಕರಸು ಆನೆ ಬಾಕಿಲ್‌ಡ್ ನಂದಾದೀಪೊ ಪೊತ್ತಾದೀದ್ ಸಾದಿ ತೂವೊಂದುಲ್ಲೆ. ಬೀಮೆ ತಾರೊಂದು ತಬ್ಬೊಂದು ಕುರು ಬಾಕಿಲ್‌ಗ್ ಪೋಯೆ. ಉಲಯಿ ಪೊಗ್ಗಿಯೆ. "ಏರ್‌ದೆ ಪೊನ್ನೆ ಆನೆ ಬಾಕಿಲ್‌ಡ್ ಬರ್ಪುನ ಬುಡುದು ಕುರು ಬಾಕಿಲ್‌ಡೆ ದಾನೆ ಬತ್ತ? ನಿಕ್ಕ ಆತ್ ಪೋಡಿಗೆ ದಾನೆ?"

"ನಿನ್ನ ಕಯ್ ಸೇರಿ ಬುಕ್ಕೊ ಎಂಕ್ ಪೋಡಿಗೆ ದಾನೆ?" ಪನ್ನಗ ಕೀಚಕರಸು ಪಾರೊಂದು ಪೋಯೆ. ತೂಂಕುನ ಉಯ್ಯಾಲೆಡ್ ಪೂವುತ ದಲ್ಯೆ ಪಾರಾಯೆ. "ಬಲ್ಲದಿ ಪೊನ್ನೆ" ಪಂಡೆ.

"ಬರ್ಪುಂಡ ಬರೊಲಿ, ಕುಲ್ಲುಂಡ ಕುಲ್ಲೊಲಿ. ನಮೊ ರಡ್ಡಾಟೊ ಚೆನ್ನೆಗೊಬ್ಬು, ಪಗಡೆಯಾಟೊ ಗೊಬ್ಬೊಡು"

"ಗೊಬ್ಬುನಾಂಡ ಗೊಬ್ಬೊಲಿ. ಆನ್ ಸೋತಿನೆಂಡ ಸೋತಿಲೆಕ ಆವಂದ್, ಗೆಂದಿನೆಂಡ ಗೆಂದಿಲೆಕ ಆವಂದ್. ಎಲ್ಲೆ ನಮೊ ಗೊಬ್ಬುಕೊ"

"ಎಲ್ಲೆದವು ಎಲ್ಲೆ ಗೊಬ್ಬೊಡು, ಇನಿತವು ಇನಿ ಗೊಬ್ಬೊಡು. ಎಲ್ಲೆದ ಬಡವುಗು ಎಲ್ಲೆನೆ ಉನೊಡು ತೂಲ. ಇನಿತ ಬಡವುಗು ಇನಿ ಉನೊಡು" ಪನ್ನಗ ಕೀಚಕರಸು ಏಲೇಲ್ ಲೋಕೊದ ಗಿಂಡಿ ಗವೊಡು ಪಾರೊಂದು ಪೋಯೆ. ಕಲ್ಲ ಕಲೆಂಬಿದ ಬಾಕಿಲ್ ದೆತ್ತಾದ್ ಬೊಲ್ಲಿದ ಚೆನ್ನೆದ ಮನೆ ದೆತ್ತೆ. ಬಂಗಾರ್‌ದ ಪರಲ್ ಕೊಂಡತ್‌ದ್ ಕುಲ್ಲಿಯೆ. ಒಂಜಿ ಆಟೊಡು ದೊರುಪತಿಗ್ ಗೆಲ್ಕಯಿ ಆಂಡ್. ರಡ್ಡಾಟೊಡು ದೊರುಪತಿ ಗೆಲ್ತಲ್. ಮೂಜಿನೆ ಆಟೊಡು ಕನ್ನೆ ದೊರುಪತಿಗ್ ಗೆಲ್ಕಯಿ ಆತ್‌ಂಡ್.

ಕೀಚಕೆ ಗೆಂಡೊ ಕೋಪೊಡು ದೊರುಪತಿನ್ ಮಟ್ಟ ಮಲಂಕನೆ ಮಲ್ತೆ. ತಿಗಲೆಗ್ ಕಯ್ ಪಾಡಿಯೆ. "ಕೇಂಡನೊ ಪೊನ್ನೆ ನಿನ್ನ ತಿಗಲೆ ಈತ್ ಗಟ್ಟಿ ದಾನೆದೆ?"

"ಆತ್ ಗಟ್ಟಿ ಇದ್ಯಂಡ ಅಯ್ವೆರೆನ್ ಸುದಾಪುನೆ ಎಂಚ?" ಏಳ್ ಇರ್‌ಲ್ ಏಳ್ ಪಗೆಲ್ ಸಾದನೆದ ಗರಡಿ ಅದುರುಂಡು. ರಣರಂಗನೆ ಆಂಡ್. ಎಣ್‌ಮೆನಾನಿ ಸಮ ರಾತ್ರಿದ ಪೊರುತುಗು ಬೀಮೆ ಏಳ್ ಲೋಕೊದ ಗೆಂಡೊ ಕೋಪೊ ತಾಲಿಯೆ. ಎಡತ್ತ ಕಾರ್‌ದ ಉಂಗುಸ್ಪೊಡು ದೆತ್ತಾದ್ ಕೀಚಕನ್ ಮಿತ್ತ್ ಪಾರಾಯೆ. ಸಿರ್ತ್ ಬೂರೊಡಂಟ ಪಾಂಡಲ ಕತ್ತಿ ದೆತ್ತೆ. ಮೂಜಿ ತುಂಡು ಮಲ್ತ್ ಪಾರಾಯೆ.

"ಎನ್ನ ಕುಲೊಕು ರಡ್ಡನೆ ಜಾತಿನ ಬೂಮಿದ ಮಿತ್ತ್ ದೀವಯೆ" "ಬಡಕಾಯಿ ಮಾವೆರಿಗಂಗಿ, ತೆನ್‌ಕಾಯಿ ತೆಂಕಿನ ಗಂಗಿ, ಮೂಡಾಯಿ ಮೂಡಿನ ಸಮುದ್ರೊ, ಪಡ್ಡಾಯಿ ಮುಪ್ಪಿಗಂಗಿ. ಈ ನಾಲ್ ಗಂಗೆದ ಉಳಯಿ ಕೀಚಕ ವಂಸೊ ದೀಡಯೆ" ಪಂಡ್‌ದ್ ಪಿದಡೊನು ಬರ್ಪೆ. ದೊರುಪತಿನ ವೇಸೊನು ದೊರುಪತಿಗೆ ಕೊರ್ಪೆ.

ಗೋಲಿದ ಮರ ಪೊರಿತ್‌ದ್ ನೆರೆಲ್‌ಗ್ ಬೀಮೆ ಪತೊಂಡೆ. ಕುಕ್ಕುದ ಮರ ಪೊರಿತ್‌ದ್ ಕುದಂಟ ಮಲ್ತೊಂಡೆ. ಕೊಂಗರೆ ಕೂಲಿ ಕಡೆವೊನುದು, ಕೆಂಚಿ ಮೀಸೆ ಕೆಂಗಿರಿ ಕಣ್ ತಿರ್‌ಗವೊನುದು ಬತ್ತೆ. ಬೂಮಿ ತೂಕೊದ ಗದೆ ಪುಗ್ಗೆಲ್‌ಡ್ ದೀವೊಂಡೆ. ಪಾಂಡಲ ಕತ್ತಿ ಬೀಜೊಂದು ಬತ್ತೆ.

ದರ್ಮರಾಯೆರ್ ಬತ್ತಾದ್ ಅಡ್ಡ ಉಂತಿಯೆರ್. "ಬೀಮು, ಒಂಜಿ ಕೋಪೊಡು ಗುವೆಲ್‌ಗ್ ಲಾಗಿಯುನೆ ಅತ್ತ್. ಮಿತ್ತ್ ಬರಿಯರೆ ಕಸ್ಸ ಆವು. ಕುಲೊತ ಮಿತ್ತ್ ರಡ್ಡ್ ಎನ್ನಡ. ಜಾತಿದ ಮಿತ್ತ್ ರಡ್ಡ್ ಎನ್ನಡ. ಕೀಚಕನ್ ಕೆರಿಯ ಚಿಂತೆ ಇದ್ದಿ" ಎಂದೆರ್.

"ಏತ್ ಮಾತ್ರೊಗುಲಾ ಉಂತಯೆ ಯಾನ್. ಕೀಚಕ ವಂಸೊ ಬೂಮಿದ ಮಿತ್ತ್ ದೀವಯೆ ಯಾನ್" ಪಂಡ್‌ದ್ ಪಿದಡೊನು ಪೋಪೆ.

ಮೂಡಾಯಿ ಮೂಡಿನ ಸಮುದ್ರೋ ಮುಟ್ಟು ಸಂವಾರೊ ಮಲ್ತೊನುದು ಪೋಯೆ. ಬಡಕಾಯಿ ಮಾವೆರಿ ಗಂಗೆ ಮುಟ್ಟು ಸಂವಾರೊ ಮಲ್ತೊನುದು ಪೋಯೆ. ಪಡ್ಲೊಯಿ ಉಪ್ಪಿನ ಗಂಗೆ ಮುಟ್ಟು ಸಂವಾರೊ ಮಲ್ತೊನುದು ಪೋಯೆ. ತೆನಕಾಯಿ ತೆಂಗಿನ ಗಂಗೆ ಮುಟ್ಟು ಸಂವಾರೊ ಮಲ್ತೊನುದು ಪೋಯೆ. ಇಂಚ ಚೇದನೆ ಮಲ್ತೊನುದು ಒಂಜಾನೊಂಜಿ ಊರುಗು ಬತ್ತೆ. ಸುತ್ತು ಮದಲ್ದಾದ ಒಂಜಿ ಇಲ್ಲ ದುಂಬು ರಡ್ಡ್ಡ್ ಬಾಲೆಲು ಇತ್ತೊ. ಆ ರಡ್ಡ್ಡ್ ತಗೆ ತಂಗಟಿ ಬಾಲೆಲು ಒರಿದಿತ್ತೊ. ಬೀಮೆ ಆನೆ ಬಾಕಿಲ್ಡ್ ಪೋದ್ ಉಂತಿಯೆ. ಮೂಜಿ ಅರೆ ಬಾಯಿ ಕೊರಿಯೆ. ಬಾಲೆಲು ಕುರು ಬಾಕಿಲ್ಡ್ ಬಿಸರೊಂದು ಪಾರೊಂದು ಪೋಯೊ. ಕಾಸಿ ಯಾತ್ರ ಎದ್ದಾರಿ ಪತ್ತಿಯೊ ಬಾಲೆಲು. ಕಾಡ್‌ಸಾದಿ, ಮುರುಡೊಂದು ಪಾರೊಂದು ಬೂರೊಂದು ಪೋಪ. ಎದರ್‌ಗ್ ಕದ್ರಿ ತಲೊತ ಅಯ್ಯೆರ್ ಜೋಗೊದ ಪುರುಸೆರ್ ಬರ್‌ಪೆರ್. ಬಡಕಾಯಿ ಗಂಗೆ ಮೀಯೊನುದು ಬರ್‌ಪೆರ್. ಕಾಶಿ, ರಾಮೇಸ್ವರೊ, ಕನ್ಯಾಕುಮಾರಿ ಮೀಯೊನುದು ಬರ್‌ಪೆರ್. ಏಳ್ ಗಂಗೆ ಸಾನ ಜಪ ಮಲ್ತೊನುದು ಕದ್ರಿ ತಲೊತ ಪುರುಸೆರ್ ಕಡತಾದ್ ಪೋಯೆರ್. ಪಿರವುಡುದು ಬಾಲೆಲ್ ಬುಲಿಪಿ ದನಿ ಕೇನುಂಡು. ಪುರುಸೆರ್ ಪಿರ ತಿರ್‌ಗಾದ್ ತೂಯೆರ್. ಪಿರ ತೂನಗ ರಡ್ಡ್ಡ್ ತಗೆ ತಂಗಟಿ ಬಾಲೆಲ್. ರಡ್ಡ್ಡ್ ತಗೆ ತಂಗಟಿ ಬಾಲೆಲ್ ಪಾರೊಂದು ಬರ್ಪುನ ತೂಯೆರ್. ಬಾಲೆಲ್ ಪುರುಸೆರೆ ತರೆ ಕೊಡಿ ತೂಯೆರ್. ಪಾರೊಂದು ಬತ್ತಾದ್ ಆನ್ ಬಲತ್ತಾದ್ ಉಂತಿಯೆ. ಪೊನ್ನ ಎಡತ್ತಾದ್ ಉಂತಿಯಲ್. ಕಾರ್‌ಗ್ ಅಡ್ಡ ನೀಟ ಬೂರಿಯೆರ್.

ಮಲ್ಲ ಅಯ್ಯೆರ್ ಬಾಲೆಲೆನ್ ದೆರ್ತ ತಟಿಯೆರ್. ಕಣ್ಣಾದ ನೀರ್‌ನ್ ಒಚಿಯೆರ್. ಬಾಯಾರ ಮುದ್ದಡಿಯೆರ್. "ಎಲ್ಯ ಪ್ರಾಯೊದ ಬಾಲೆಲು ನಿಕ್‌ಲ್. ವಾ ಕುಲೊತವು ಬಾಲೆಲು? ದಾನೆ ಕಸ್ಸು ಬತ್ತಂಡ್ ನಿಕ್‌ಲೆಗ್?" ಪಂಡಾದ್ ಕೇಂಡೆರ್.

"ಆನಿದ ದಿನೊಟು ಎಂಕಲೆ ಅಪ್ಪೆ ಅಮ್ಮೆ ಬಂಜಿಡ್ ಪುಟ್ಟಿಯೊ. ಇನಿತ ದಿನೊಟು ನಿಗಲೆ ಬಂಜಿಡ್ ಪುಟ್‌ದೊ. ಎಂಕಲೆ ಜೀವೊ ಒರಿಪುಲೆ. ಎಂಕಲೆ ಕುಲೊ ಬೂಮಿದ ಮಿತ್ತ್ ಒರಿಪುಲೆ" ಪಂಡಾದ್ ಕೇಂಡೆರ್.

ಪುಗ್ಗೆಲ್‌ಗ್ ಪಾಡಿನ ಮುಪ್ಪೊ ಮೊಲೊತ ಕೋಲು ಕಂಬಿ ದೋತುರೊ ದೆತ್ತೆರ್. ಕೋಲು ಕಂಬಿ ದೋತುರೊನು ರಡ್ಡ್ಡ್ ತುಂಡು ಮಲ್ತೆರ್. ರಡ್ಡ್ಡ್ ತುಂಡುಟು ರಡ್ಡ್ಡ್ ಜೋಲಿಗೆ ಮಲ್ತೆರ್. ಆನನ್ ಬಲತ ಜೋಲಿಗೆಟ್ ಕುಲ್ಲಾವೊಂಡೆರ್. ಪೊನ್ನನ್ ಎಡತ ಜೋಲಿಗೆಟ್ ಕುಲ್ಲಾವೊಂಡೆರ್. ಪತ್ತ ಎಜ್ಜೆ ಪದಿನಾಜಿ ಜಾವೊ ಪೋನಗ ಬೀಮೆ ಪಾರೊಂದು ಬರ್ಪೆ.

ಬೀಮೆ ಪಾರೊಂದು ಬನ್ನಗ ಅಡ್ಡ ಬೇರ್ ಕಡಿಯುಂಡು. ಗುಂಡು ಕಲ್ಲ ಪೊಡಿಯುಂಡು. ಕಾರ್‌ದ ಮನ್ನ ತರೆಕಾಂಡ್. ಕೆಂಚಿ ಮೀಸೆ ಕೆಂಬಿರಿ ಕನ್ನ ನಾಡೊಂದು ಬತ್ತೆ. ದುಂಬುಗು ಪುರುಸೆರೆ ತರೆ ಕೊಡಿ ತೂಯೆ.



"ಏರಾಯೆ ಮಂದೆ ಏರು ಪೋಪಿ ಎದ್ದಾರಿಡೆ ಪೋಪಿನೆ?" ಕೇಂಡೆ.

ಪಿರ ತಿರಾಗಾದ್ ಉಂತಿಯೆರ್ "ಎಂಕುಲು ಕದಿರೆ ತಲೊತ ಪುರುಸೆರ್" ಪಂಡೆರ್.

"ಕದಿರೆ ತಲೊತ ಪುರುಸೆರ್ ಕಳು ಪನಯರ್. ಕಪಟೊ ಗೊಬ್ಬನ ಜಾತಿಯತ್ತ್.

ಏನ್ ರಡ್ಡ್ ಪಾತೆರೊ ಕೇನ್ನವುಂಡು" ಪನ್ನಗ "ಕೇನ್ಲ ಬೀಮ. ಸತ್ಯೊ ಇತ್ತಿನವು ಸತ್ಯೊದ ಲೆಕ್ಕ ಪನ್ನೊ ತೂಯಿನವು ತೂಯಿ ಲೆಕ್ಕ ಪನ್ನೊ"

"ಅರ್ತೊ ಮನ್ನೊನ್ಲೆ! ಯಾನ್ ಕೀಚಕ ವಂಸೊ ಸೇದನೆ ಮನ್ನೆ. ಅಲ್ತ ರಡ್ಡ್ ತಗೆ ತಂಗಟಿ ಬಾಲೆಲು ಕಡೆ ಬಾಯಿಡ್ ತಾಲ್ದ್ ಪೋಯೊ. ತತ್ತ್ದ್ ಪೋಯೊ. ಓಲು ಪೋಯೊ? ಒಲ್ಪು ಪೋಯೊ? ಇಂಚಿ ಬತ್ತೊನೊಯೇ?" ಎಂದ್ ಕೇಂಡೆ.

"ಬರಿಯರ ಬತ್ತನೆಲಾ ಅಂದ್. ಕೇಣಿಯರ ಕೇಣಿನೆಲಾ ಅಂದ್. ಆನ್ ಬತ್ತಂಡ್ ಬಲತ್ತಗ್ ಪೋಂಡ್. ಪೊನ್ನು ಬತ್ತಂಡ್ ಎಡತ್ಗ್ ಪೋಂಡ್. ತೂಂಡ ತೋಜುಂಡು. ಲೆತ್ತಂಡ ಕೇನುಂಡು. ಬೆರಿ ಕೊರುದು ಪೋಯಂಡ ಬೀಮ ಬಾಲೆಲು ಸಿಕ್ಕುವೊ" ಪಂಡೆರ್.

ಬೀಮ ಬಡೆಕಾಯಿ ಮೋನೆ ಪಾಡ್ಡ್ ಪಾರೊಂದು ಪೋಯೆ. "ಪೋಯಿ ಭೀಮೆ ಪಿರ ಬತ್ತೆಡ ಎಂಕಲೆ ಪಾತೆರೊ ಸುಳ್ಳಾವು. ಬಾಲೆಲೆನ್ ದೀವಯೆ". ಮೂಜಿ ಪಚ್ಚೆ ನಡತೆರ್. ಮೂಜಿ ಕಲ್ ಪೆಜಿಯೆರ್. ಮಂತಿರಿತೆರ್. ದುಂಬುಗು ಬೀಮೆ ಪೋಯಿ ಸಾದಿಗ್ ದಕಿಯೆರ್. "ದುಂಬುಗು ಪೋಯಿ ಬೀಮೆ ಏಳ್ ಕಡಲ ಆಪೆಗ್ ಪೋಲ. ನಾರಾಯಣ ದೇವೆರೆ ಕುಂಚಾಲ್ ಬೀಜಾವೊಂದು ಇಪ್ಪುಲ. ಅವ್ವೆನ್ ಕಡತ್ ಬರಡ. ಬತ್ತನೆಂಡ ಕುಪ್ಪಿದ ಕಾಡ್, ಸೂಜಿದ ಗುಡ್ಡೆ, ನೈಸ್ರಂಗ್, ಕೆಂಜಿಗ ವನಮಾಂತ ಆವೊಡು" ಪಂಡೆರ್.

"ಅವ್ವೆನ್ ಕಡತೊಂದು ಬತ್ತೆಂಡ ಅಡ್ಡ ಸುದೆ ಆವೊಡು. ಸುದೆಟ್ತ್ಯ ಕಯ್ ಕಂತಾಂಡ ಕಯ್ ಕಲ್ಲಾವೊಡು. ಕಾರ್ ಕಂತಾಂಡ ಕಾರ್ ಕಲ್ಲಾವೊಡು. ಬೀಮೆ ಬತ್ತದ್ ನೀರ್ಗ್ ಜತ್ತೆಡ ಕಲ್ಲಾದ್ ಬೂರೊಡು" ಎಂದ್ ಆಜಿನೆ ಮಲ್ತೆರ್.

"ಆಯಿರೆಡೊಂಚಿ ಅತ್ತೊಸುದ ಮರ. ಈಯರೆಡೊಂಚಿ ಪಿಜತ ಮರ. ಆಯಿರೆತ ಜನೊ ಈಯರೆ ಬರೊಡ್ಡ, ಈಯರೆತ ಜನೊ ಆಯಿರೆ ಪೋವೊಡ್ಡ ಪದಾರಾಡ್ ವರುಸೊಗು ವರನೆ ಮರನ್ ಮರ ಕೂಡೊಡು. ಒಂಚಿ ದಿನೊಕು ಆಯಿರೆತ ಜನೊ ಈಯರೆ ಬರೊಡು, ಈಯರೆದ ಜನೊ ಆಯಿರೆ ಪೋವೊಡು" ಇಂಚ ಒಂಚಿ ಸಾಪೊ ಕೊರಿಯೆರ್.

ಬಾಲೆಲೆನ್ ಅಲ್ತ ಲೆತೊಂದ್ ಒಂಜರೆ ದಿನೊತ ಹರದಾರಿಗ್ ಬತ್ತೆರ್. ಮಲ್ಲ ಮೆಯಾದಾನ್ಡ್ ಕಾಸಿ ಕಂಬೊಲಿ ಆಸಿಯೆರ್. ನಡುಟ್ಟು ದೇವೆರೆ ಪೆಟ್ಟೆ ಜಾಯೆರ್. ಬಾಲೆಲೆನ್ ತಿರ್ತ ಮಲ್ತೆರ್. ಸುತ್ತಮುತ್ತ ಗಂಟ್ ಮೂಟೆ ದೀಡೊಂಡೆರ್. ಅಪೋಲಿ ಬಂಗಿ ಪಾಡೊಂಡೆರ್. ರಾಮ ವಾಕ್ಯೊ ಓದೊಂಡೆರ್. ಸಿರಿ ನಾರಾಯಣ ಪದೊ ಪಂಡೊಡೆರ್. ಮಲ್ಪಿ ಕ್ರಮೊ ಮಲ್ತೊಂಡೆರ್. ಆನನ್ ದೆತ್ತ ಬಲತ ಜಕ್ಕಿಲ್ಡ್ ಕುಲ್ಲವೊಂಡೆರ್. ಪೊನ್ನನ್ ದೆತ್ತದ್

ಎಡತ್ತ ಜಕ್ಕೆಲ್ಡಾ ಕುಲ್ಲವೊಂಡೆರ್.

"ಎಲ್ಯ ಪಿರಯೊದ ಬಾಲೆಲು ನಿಕುಲು. ದಾನೆ ಉದ್ಯಗ, ದಾನಿ ಕೆಲಸೊ ಮಲ್ಪುವರ್ ಬಾಲೆಲೆ?" ಪನ್ನಗ -

"ಎಂಕ್ಲೆೊ ಜಾತಿ ಕಟ್ವಾ ಕುಲೊ ಕಸುಬು ಬುಡ್ಡಾತ್ ಇಪ್ಪುಚೊ" ನಿಕಲ್ ಎಲ್ಯ ಬಾಲೆಲಾಂಡಲ ಜಾತಿ ಕಟ್ವಾ ಕುಲೊ ಕಸುಬು ಬುಡ್ಡಾರಾಂದ್ ಪುರುಸೆರೆಗ್ ಕುಸಿಯಾಂಡ್. ಮೂಜಿ ಕಲ್ಲಾ ಮಂತಿರಿತ್‌ದ್ ಮತ್ತಾಸೊನೆ ಗಿಲಿಯಂದಾನೆ ಪರ್ವತೊಗು ದಕಿಯೆರ್. ಮಲೆನೆ ಮಾಯಕ ಆವೊಡು ಎಂದೆರ್. ಈಂದ್ ಈಚಿಲ್ ಮೂರು ಮುರ್ರೆ ಎಚ್ಚೊಡು ಎಂದೆರ್.

ದುಂಬುಗು ಒಂಜಿ ಕಲ್ಲಾ ದಕಿಯೆರ್, ಎರು ಬಿತ್ತಾ ಕಿದೆ ಕಿಲಾರೊ ಆವೊಡು ಎಂದೆರ್. ಮಗ್ಗೊಂಜಿ ಕಲ್ಲಾ ಅಕ್ಲಾದೆ ದಕಿಯೆರ್. ಸಿರಿ ಗಿಂಡೆದ ನೀರ್ ಪತೊಂಡೆರ್. ನಾಗ ಬೆತ್ತ, ಮೈರಾದ ಕುಂಚ ಪತೊಂಡೆರ್. ನಾಗಬೆಚ್ಚ ಮೈರಾದ ಕುಂಚ ಪತೊಂದ್, ಸಿರಿ ಗಿಂಡೆದ ನೀರ್ ತಲಿತೆರ್. ಮೈರುದ ಕುಂಚೊಡು ಎದಿಯೆರ್. ನಾಗ ಬೆತ್ತ ಒಯ್ಯೊಂದು ಏಳ್ ಸುತ್ತ ಬತ್ತೆರ್. ಏಳ್ ಸುತ್ತ ಬನ್ನಗ ಏಳ್ ಸೂತ್ರೊದ ಅರಮನೆ ಆಂಡ್. ಮೂಜಿ ಪುಂಡಿ ಬಿಕ್ಕಿ ಕೊರ್ಪೆರ್.

"ಬಾಲೆಲೆ ಒಂಜಿ ಪುಂಡಿ ಅಚ್ಚೊಡು ಪಾಡ್‌ದ್ ದೀಲೆ. ಒಂಜಿ ಪುಂಡಿ ಬಲಟ್ವಾ ಪಾಡ್‌ದ್ ದೀಲೆ. ಒಂಜಿ ಪುಂಡಿ ಮೂಲೆಡ್ ಪಾಡ್‌ದ್ ದೀಲೆ. ಕೊರಿ ಬಿಕ್ಕಿನ್ ಮುಟ್ಟಿಡೆ ಬಾಲೆಲೆ. ನಿಗಾಲೆ ಬದ್‌ಕ್ ನಿಕಲ್‌ಗ್ ದುಂಬುಗು ಗುರ್ತನೆ ಸಿಕುಜಿ" ಎಂದೆರ್.

"ನಿಕಲ್‌ನ್ ಮುಟ್ಟಿ ದೋಸೊಗು ಎಂಕುಲು ಏಲ್ ಗಂಗೆ ಸಾನ ಜಪ ಮಲ್ತೊನುದು ಬರ್ಪೊ" ಪನ್ನಗ,

"ಎಂಕ್ಲೆಗ್ ಮೂರು ಮುರ್ರೆ ಕೊರಿಯರ್. ಎರು ಬಿತ್ತಾ ಕೊರಿಯರ್. ಕಿದೆ ಕಿಲಾರೊ ಇಲ್ಲಾ ಇಡೆ ಕೊರಿಯರ್. ಐಸಾರೊ ಬಾಗ್ಯೊ ಕೊರಿಯರ್. ಬೋರು ಗುಡ್ಡೆಟ್ ಕಾಟ್ ಕಾಯೆರ್‌ದ ಮರ ಪುಟ್ಟುದು ಮರ ಸಯ್ಪುನ ಬಾಲುವೆಯಾಂಡ್" ಪಂಡೆರ್.

"ದಾದ ಬಾಲೆಲೆ ನಿಗಲ್‌ಗ್ ಆವೊಡು?" ಕೇಂಡೆರ್.

"ಎಂಕ್ಲೆಗ್ ಅನುಬೋಗೊ ಬರೊಡು. ಲಗ್ನೊ ಅಸೊ ಆವೊಡು"

"ನಿಕಲ್‌ಗ್ ಗೊತ್ತುಂಡು. ನಿಕಲೆನ ಕೂಡು ನಿಕಲೆ ಬಂದು ಬಲಗೊ ಬೂಮಿದ ಮಿತ್ತಾ ಸೇದನೆ ಆತ್‌ಂಡ್. ಎಂಕ್ಲೊ ದಾನೆ ಪೊನ್ನಗ್ ಆನ್ ತೂತ್ ದೀತೊನೊ? ಆಂಡಲಾ

ಮಲ್ಲೆ ಇದ್ದಿ. ಈತ್ ಮಲ್ತಿನೆಗ್ ದುಂಬುಗು ನಿಗ್ಲೆಗ್ ಮದಿಮೆ ಮೈಸಿರಿ ಮಲ್ಪಂದೆ ಬುಡಯೊ. ಎಂಕುಲು ನಾಲ್ ಗಂಗೆ ತಿರುಗೊನುದು ಬರ್ಪೊ. ನಿಕ್ಲೆ ಒರಿದ್ ಇತ್ತರಾಂಡ ಆನಗ್ ಪೊನ್ನ, ಪೊನ್ನಗ್ ಆನ್ ತೂದು ಬರ್ಪೊ" ಎನ್ನಗ "ಪುರುಸೆರೆ ಉಂದು ಮಾತ ಆಪಿ ಪೋಪಿ ಕೆಲಸೊ ಆತ್. ನಿಕ್ಲೆ ನಾಲ್ ಗಂಗೆ ತಿರುಗೊನು ಬರ್ಪುನೆ ಏಪೊ? ಎಂಕಲೆ ಮದಿಮೆ ಆಪುನೆ ಏಪೊ? ಈತ್ನೆಟ ಆತ್ಜಿ. ಇನಿಡಾದ್ ಬುಕ್ಕೊ ಆವರೆ ಬಲ್ಲಿ. ನಡು ಸಳೊಟು ಆಪಿಂಚಿ ಕೆಲಸೊ"

"ದಾದ ಬಾಲೆಲೆ?" ಎನ್ನಗ

"ಎಂಕಲೆಗ್ ಬರಿ ಬಾಂದ್ರಾ ತೆರತಾದ್, ತಗೆ ತಂಗಟಿಗ್ ಮದಿಮೆ ಮೈಸಿರಿ ಮಲ್ಪಲೆ"

"ಬಾಲೆಲೆ ತಗೆ ತಂಗಟಿಗ್ ಮದಿಮೆ ಮೈಸಿರಿ ಆಪುನವುಂಡೊ? ತುಂಬಂದಿ ಪಾಪೊ ತುಂಬಾಯರ್"

"ಮಲ್ಲೆದ್ದಿ" ಎಂದೆರ್. ಪುರುಸೆರ್ ಬಾಲೆಲೆ ಪಾಪೊ ಪೊರ್ದಾವೊಂಡೆರ್.

"ಕೀಚಕ ವಂಸೊದ ಬಾಲೆಲೆಗ್ ಲಗ್ನೊ ಮಲ್ಪುಂಡು. ಕದ್ರಿ ತಲೊತ ಪುರುಸೆರ್ ಲಗ್ನೊ ಅರ್ಸೊ ಮಲ್ಪುಂಡು" ಎಂದ್ ಊರುನು ಕೂಡು ನಾಡ್ನ್ ಸೇರ್ಸಾಯೆರ್. ರಡ್ಡ್ ಪಾಲ್ ಆತ್ ಆನಗ್ ಊರು, ಪೊನ್ನಗ್ ತಮೆರಿ ಉಂತ್ಯೆರ್. ದಾರೆತ ಮನೆಕ್ ಲೆತೊಂದ್ ಬತ್ತೆರ್. ಆನನ್ ಮೂಡಯಿ ಮೋನೆ ಪಾಡಾದ್ ಉಂತಯೆರ್. ಪೊನ್ನನ್ ಪಡ್ಡೊಯಿ ಮೋನೆ ಪಾಡಾದ್ ಉಂತಯೆರ್.

ಆನಡ ಪೊನ್ನ ದಾನೆ ಆವೊಡು ಕೇನ್ನಗ "ಎನ್ನ ತಂಗಡಿ ನೆನಪುಂಡು" ಪನ್ನೆ. ಪೊನ್ನಡ ಆನ್ ದಾನೆ ಆವೊಡು ಕೇನ್ನಗ "ಎನ್ನ ತಗೆ ನೆನಪುಂಡು" ಪನ್ನಳ್.

ಕದ್ರದ ಮಂಜುನಾತ ದೇವೆರೆ ತೀರ್ತಾ ತಲಿತೆರ್. ಆನಡ ಪೊನ್ನ ದಾನೆ ಆವೊಡು ಕೇನ್ನಗ "ಎನ್ನ ಬುಡೆದಿ" ಪಂಡೆ. ಪೊನ್ನಡ ಆನ್ ದಾನೆ ಆವೊಡು ಕೇನ್ನಗ "ಎನ್ನ ಕಂಡನಿ" ಪಂಡಲ್. ದುಂಬುಗು ಸರಿ ಮನೆಟ್ ಮೂಡಾಯಿ ಮೋನೆ ಪಾಡಾದ್ ಕುಲ್ಲಾಯೆರ್.

ಸೊಂಡಿಲ ಬಾಸಿಂಗ ಕಟ್ಟೆರ್. ದತ್ತ ದಾರೆ ದಂಗಯೆರ್. "ಎಂಕಲೆಗ್ ಜೂವೊಟು ಬಾರಿ ಸಂಕಟ ಆಪುಂಡು" ಪಂಡೆರ್. "ಎಂಕಲೆಗ್ ಮಕ್ಕಳ ಕಟ್ಟ್ ಬೊಡ್ಚಿ. ಅಳಿಯ ಕಟ್ಟ್ ಆವೊಡು. ಸಮ್ಮಲೆ ಬದ್ಕ ಅರ್ಪತಗ್ ಸಿಕ್ಕೊಡು. ಅಮ್ಮ ಬದ್ಕ ಬೊಡ್ಚಿ?"

"ಆವು ಬಾಲೆಲೆ" ಎಂದೆರ್. ಸೊಂಡಿಲ ಬಾಸಿಂಗ್ ಬುಡ್ಡಾದ್ ಪೂತ ಜಲ್ಲಿ ಕಟ್ಟಿಯೆರ್. ದಾರೆದ ಮನೆಟ್ ಬಾಲೆಲೆಗ್ ಪುದರ್ ತೆರ್ತೆರ್. ಅಮಾಲೆ ಬನ್ನಾಲೆ ದೇವಿ ಬೈದೆ, ಸಾಲೆ ಬನ್ನಾಲೆ ಕಾಂತುನ ಬೈದೆ ಎಂದೆರ್ ಪುದರಾಂಡ್.

"ನಿಕೆಲೆಗ್ ರಡ್ಡ್ ಅಮರ್ ಬಾಲೆಲೆ ಪುಟ್ಟುವೊ" ಪಂಡೆರ್.

"ಪುರುಸೆರೆ, ಎಂಕಲೆಗ್ ಮದಿಮೆ ಮೈಸಿರಿ ಮಲ್ತಾರ್. ಎಂಕಲೆ ಪುದರ್ ತೆರ್ತೆರ್. ನನ ಪುಟ್ಟುನ ಬಾಲೆಗ್ ಪುದರ್ ತೆರ್ತೆರ್ ಪೋಲೆ" ಪಂಡೆರ್.

"ನಿಕುಲು ಎಲ್ಯ ಬಾಲೆಲು. ನಿಕುಲು ಮಲ್ಲೆ ಆದ್ ಪುಟ್ಟುನ ಬಾಲೆಲೆಗ್ ದಾನೆಂದ್ ಪುದರ್ ಲೆಪ್ಪುನೆ? ಮಲ್ಲೆದ್ಲಿ. ಪೊನ್ನ ಬಾಲೆಲೆ ಪುಟ್ಟಿಯೊಡ ಅಬ್ಬಗೆ ದಾರಗೆಂದ್ ಲೆಪ್ಪುಲೆ. ಆನ್ ಬಾಲೆಲೆ ಪುಟ್ಟಿಯೊಡ ಚಿವ್ವಾಯ ಚಿಕ್ಕಾಯೆಂದ್ ಲೆಪ್ಪುಲೆ" - ಎಂದೆರ್. ಪಿದಡೊನುದು ಪೋಪೆರ್.

ಅಲವುದ ದಂಟೆ ಪತ್ತೊಂಡೆರ್. ಜೋತಿ ಕೋಲು ಪತ್ತೊಂದು ಪೋಪೆರ್. ಇಲ್ಲ ಪಿರವುದ ಮಿತ್ತ್ ತರೆ ಪೋಯಿ ಸಾಂತಿ ಮರತ ಗುರುತ ದೀತ್ ಪೋತೆರ್.

ಬಡೆಕಾಯಿ ಗಂಗೆ ಮಿಯೊಂಡೆರ್. ಕಾಸಿ ರಾಮೇಸ್ವರೊ ಮೀಯೊಂಡೆರ್. ಕನ್ಯಾಕುಮಾರಿ ಬದ್ರಿ ನಾರಾಯಣ ಮೀಯೊಣುದು ಸಾನ ಜಪ ಮಲ್ತೊಂಡೆರ್. ಮಕೆ ಮಾಯೊ ಮೀತ್ ಪಿರ ಪಿದಡಿಯೆರ್. ಒಂಜರೆ ಆಲ್ ಎತ್ತರದ ಅಲವುದ ದಂಡ್ ಒಂಜಿ ಗೇಣ್ಗ್ ಬತ್ತಂಡ್. ತಾರೆಗ್ ಪದನಾಜಿ ಒರಸೊ ಕಡತೆದ್ ಪೋತೆಂಡ್. ಸರೆ ಪೋತಿನ ಸಾಂತಿದ ಮರತವುಲೆ ಬತ್ತೆರ್. ಬನ್ನಗ ಸಂಜೆ ಮಂಜೆತ ಪೂರ್ತಾತ್ಂಡ್. "ನಮೊ ತಡೆ ಬುಡರೊಗು ಓಡೆಗ್ ಪೋಪುನೆ" ಎಂದ್ ಕೇನ್ನಗ-

"ದುಂಬು ಸಿಕ್ಕುನವು ಕಾಡ್. ಅಪಗ ನಮೊ ಎಲ್ಯ ಪ್ರಾಯೊದ ಬಾಲೆಲೆನ್ ಸಾಂಕ್ದ್ ಸಲಗ್ದೊ. ಪೂ ಪೂಜನೆ ಉಪದೇಸೊ ಕೊರ್ದ್ ಪೋತೊ. ಆಡೆಗ್ ಪೋಯಿ. ಬಾಲೆಲೆನ್ ಪಾತೆರ್ಪಾಯಿ ಲೆಕ್ಕಾಂಡ್"

"ಆಡೆಗ್ ಪೋಂಡ ನಮ ಗುರ್ತಾಂಡ ಆವಂದ್. ಆಡೆಗ್ ಪೋಪುನ ಬೊಡ್ಡಿ" ಆಡೆಗೇ ಪೋಯಿ. ಪೋಯಿಜಿಡ ಪಾತೆರ್ಪಾದ್ ಪೋಪಂದ್ ಪಂಡಿ ಪಾತೆರ ಸುಳ್ಳಾಂಡ್" ಇಂಚ ಪಂಡೆದ್ ಜತ್ತೆದ್ ಜಾಲ ಮುದೆಲ್ಗ್ ಬತ್ತೆರ್. ಜಾಲ ಮುಂದಿಲ್ಗ್ ಬತ್ತೆದ್ ಮುಕ್ಕೊಲು ಲೆತ್ತೆರ್. ದೇವಿ ದೇವಿಂದ್ ಮುಕ್ಕೊಲು ಲೆಪ್ಪುನಗ ಪಿದಯಿ ಬತ್ತಲ್.

"ಲೆಪ್ಪುನವು ದಾನೆ ಕತೆ?"

"ಎಂಕುಲು ಕದ್ರಿ ತಲೊತ ಪುರುಸೆರ್"

"ಕದ್ರಿ ತಲೊತ ಪುರುಸೆರಂಡ ದಾನೆ ಆವೊಡು?"

"ಎಂಕಲೆಗ್ ದಾಲ ಆವೊಡ್ಡಿ. ದಾಲ ಪೋವೊಡ್ಡಿ. ನಿನ್ನವುಲು ಆಜಿ ರಾಶಿ ಪುಲ್ಯವು ಆವೊಡು" ಕೇಂಡರ್.

"ಎಂಕಲೆ ಅವುಲು ಜಾಗೆಂಡ ಓಲು ಉಂಡು? ಒಂಜಿ ಕೋನೆಡ್ ಅರಿತ ರಾಶಿ ಉಂಡು. ಒಂಜಿ ಕೋನೆಡ್ ಬಾರಾದ ರಾಶಿ ಉಂಡು. ಒಂಜಿ ಕೋನೆಡ್ ಬದ್‌ಕ್ ಬಂಗಾರ್ ದೀತ್‌ಂಡ್ ತೂಲೆ. ಒಂಜಿ ಕೋನೆಡ್ ದುಡ್ಡು ಪನಾವು ದೀತ್‌ಂಡ್. ಒಂಜಿ ಎಂಕುಲು ಜೆಪ್ಪನ ಕೋನೆ. ಒಂಜಿ ಅಟ್ಟಲರಗ್ಗನೆ ಮಲ್ಪುನೆ ಕೋನೆ. ಚಾವಡಿ ಏರಾಂಡಲ ಬತ್ತೆರ್‌ಂಡ ಕುಲ್ಲರೆಗ್ ಬೋಡು. ಮೂಲು ಜಾಗೆ ಇದ್ದಿ. ಮಿತ್ತ ಇಲ್ಲಗ್ ಪೋಲೆ"

"ಮಿತ್ತ ಇಲ್ಲಗ್ ಪೋಪುಂಡ ನಿನ್ನ ಇಲ್ಲಗ್ ಬರ್ಪುಜಿ. ನಿನ ಇಲ್ಲಲ್ ಜಾಗೆ ಉಂಡೊ ಇದ್ದಿಯೊ ತೂವೊಡು"

"ಅಪಗ ಮನಸ್ ಇತ್‌ಂಡ ಅಟ್ಟಲ್ ಮಲ್ಪುಲೆ. ಕನಕ್‌ದ ಕೊಟ್ಟಡ್ ಜೆಪ್ಪಲೆ" ಪಂಡಲ್.

"ಆವು ಬೈದೆ. ಆತಾಂಡಲ ಮಂಜುನಾತ ದೇವೆರ್ ನಿಕ್ಕು ಬುದ್ಧಿ ಕೊರಿಯೆರ್"

ಬೆಂದ್ರ ಕೊಟ್ಟಗ್ ಪೋನಗ ಮೊರಂಪಾಯಿ ಬೊನ್ನದ ರಾಶಿ ಇತ್‌ಂಡ್. ಕಾರ್ಡ್ ಬೊನ್ನ ಅಂಚಿದೆನ್ ಅಂಚಿ ಮಲ್ತೆರ್. ಇಂಚಿದ ಬೊನ್ನ ಇಂಚಿ ಮಲ್ತೆರ್. ಸುದೊ ಮುದ್ರಿಕೆ ಮಲ್ತೊಂಡೆರ್. ಕಾಸಿ ಕಂಬಲಿ ಆಸದೆರ್. ಮದೊಟ್ಟು ದೇವೆರೆ ಪಿಟರಿ ಜಾಯೆರ್. ಸುತ್ತಮುತ್ತ ಗಂಟ್ ಮೂಟೆ ಪೊಯೊಂಡೆರ್. ಮುಂದಿಲ್‌ಗ್ ಪೋಯೆರ್.

"ದೇವಿ ನಿನ ದವೊಡು ಜಾಗೆ ಆಂಡ್. ಅಯ್ಯಲ ಅರಿ ಬೆಯಿಪುನ ಒಂಜಿ ಅಗೊಲಿ ಕೊರು ಬೈದೆ" ಕೇಂಡರ್.

"ಮನ್ನಾದ ಪಾತ್ರೊ ಇದ್ದಿ. ಕಂಚಿ ತಾವೊದ ಪಾತ್ರೊ ಇಪ್ಪುನೆ. ಅವೆನ್ ದಿಕ್ಕೆಲ್‌ಗ್ ದೀಂಡ ಕಪ್ಪಾಪುಂಡು. ಇಜ್ಜಿಂದ್ ಪನ್ನರ ಇದ್ದಿ. ಒಂಜಿ ಅಗೊಲಿ ಇತ್ತಿನವು ಪದಾನಾಜಿ ಒಟ್ಟೆ ಆತ್‌ಂಡ್"

ಗೆಜ್ಜೆತಿ ಪತೊಂದು ಅಟ್ಟೊಗು ಪೋಯಲ್. ಪದಾನಾಜಿ ಒಟ್ಟೆ ಕೊಡತಾದ್ ಕೊಂಡತ್ ಕೊರಿಯಲ್. ಬೊನ್ನೊದೆಪ್ಪಿ ಕಯಿಲ್ ಪತೊಂದು ಪೋಯೆರ್. ಅಂಗರೆ ಕರಿಯಗ್ ಪೋಯೆರ್. ಪೊರ್ಲು ಮಲ್ತ್ ದೆಕಿಯೆರ್. ಮಂಜುನಾತ ದೇವರೆ ತೀರ್ತೊ ಪಾಡ್ಯೆರ್. ದಿಕ್ಕೆಲ್ ನೀರ್ ದೀಡ್ಯೆರ್.

ನೀರ್ ಬೆಚ್ಚ ಆವೊಂದು ಬನ್ನಗ ಮಗ್ಗೊರಿ ಲಕ್ಕೆರ್. ಜಾಲ ಮುಂದಿಲ್ ಪೋಯೆರ್.

"ಕೇಂಡನೊಪ್ಪೆ, ನಿನ ದವೊಡು ಜಾಗೆ ಆಂಡ್. ಅಗೊಲಿ ಆಂಡ್. ಅಯ್ಯಲರಿ



ಕೊರಾಲ ಬೈದೆ. ಕಾಂಡೆ ಪೋನಗ ಅರಿಕ್ ಅರಿ ಕೊರಾಕೊ. ಇದ್ದಿಡ ಅಯಿಕ್ ಮುಟ್ಟಿ ಪಣವಂಡ ಕೊರಾಕ "ಅರಿ ಸಾಮಾನ್ ಪರಲಾಂಡ ಇದ್ದಿ. ದಂಡಾಗ್ ಪೋತಿನಾರೆಗ್ ಕೋರಿಗ್ ದೀತಿ ಮೂಂಕಾನರಿ ಕಟ್ಟಾದ್ ಗಂಜಿ ಮಲ್ತ್ ದೀತೆ" ಪನ್ನಗ, ತಡ್ಡೆ ಸೇರಾಂಟಲ ಕೊರಾಲ" ಪಂಡೆರ್. ತಡ್ಡೆ ಸೇರ್ ದೆತೊಂಡೆರ್. ಐನ್ ಜನೊತ ಐನ್ ಜೋಲಿಗೆ ಕುಡುಪಾನಗ ಐನ್ ಅರಿ ಬತ್ತಂಡ್. ಐನ್ ಸರ್ತಿ ಅಲಪ್ಪುನಗ ಐಯಲರಿ ಆಂಡ್.

ಅರಿ ಅರ್ಕಂಜಿ ದೆತ್ತೆರ್. ನುಪ್ಪುಗು ಅರಿ ಪಾಡಿಯೆರ್. ಉನುಪ್ಪು ಬೆಯ್ಯೊಂದ್ ಬನ್ನಗ ಮಗ್ಗೊರಿ ಲಕ್ಕಿಯೆ. ಜಾಲ ಮುಂದಿಲ್ಗ್ ಬತ್ತೆ. ಕಯಾಟ್ ಪದ್ವೆದ ಬಿತ್ತ್ ಪತೊಂಡೆ. ಪಿರವು ಪೋತ್ ಒಂಜಿ ಕಲ ಪದ್ವೆ ಬಿತ್ತಾದ್ ಬತ್ತೆ.

"ಕೇಂಡನಪ್ಪೆ ದೇವಿ ನಿನ ದರಾವೊಡು ಜಾಗೆಂಚಲಾಂಡ್. ಅಗೊಲಿ ಆಂಡ್. ಉನುಪ್ಪು ಎಂಚಲ ಬೆಯ್ಯಾಂಡ್. ಕಜಿಪ್ಪುಗು ಎಂಚಿನ ಕೊರುವ ?" ಪನ್ನಗ

"ಕಜಿಪ್ಪುಗು ಎಂಚಿನ ಕೊರ್ಪುನೆ. ಎಂಕಲೆ ಅವುಲು ಪೊಟ್ಟು ಬಸಲೆ, ಕೊಯಿಪ್ಪಿ ಜನ ಇದ್ಯಂತೆ ಆತ್ಂಡ್" ಪಂಡಲ್.

"ಇಲ್ಲ ಪಿರವುಡು ಒಂಜಿ ಕಲ ಪದ್ವೆ ದೀವೊಂದು ದಾಯೆ ಸುಳ್ಳು ಪನ್ನ?"

"ಕುರು ಬಾಕಿಲ್ಡ್ ಪೋತ್ ತೂನಗ ಗೋಲಿತ ದಯಿತ ಲೆಕೊ ಇತ್ಂಡ್. ಪೊರಿಪ್ಪರೆಗ್ ಕಯಾ ಬರ್ಪುಬಿ. ತಾಂಟ್ ಮೋಂಟೆ ಕಡೆ ಪೊರ್ತಾದ್ ಕೊರ್ಪಲ್. ಈ ರಡ್ಡ್ ಕಡೆ ಕೊನಲ ಬೈದೆ" ಪಂಡೆರ್.

"ಎಂಕಲೆ ಆಂಜೊವು ಬಿತ್ತಾಗ್ ದೀತಿ ಪದ್ವೆ ಅವ್ವು"

"ಆವು ಬೈದೆ" ಪಂಡೆರ್. ಐನ್ ಪಜ್ಜೆ ದುಂಬು ಬತ್ತೆರ್. "ಪಿರ ತೂಲ ಬೈದೆ" ಎನ್ನಗ, ತೂಯಲ್. ಮಾಯಕದ ಪದ್ವೆದ ಕಲ ಮಾಯಕ ಆತ್ಂಡ್. ಪಂಚರಂಗಿತ, ನಾಚಿಕೆದ ಮುಲ್ಲು ಕೊಡಿತ್ಂಡ್. ದೇವಿ ಉಲಯಿ ಪೋಯಲ್. ಪುರುಸೆರ್ ಕಜಿಪ್ಪು ಮಲ್ತೆರ್. ಉಣಸಾ ಬಲ್ಮನೊ ಮಲ್ತೆರ್. ಕನಕ್ದ ಕೊಟ್ಟಿಗ್ ಬನ್ನಗ ಮೊರಂಪಯಿ ಉದ್ದೊ ಉಮಿತ ರಾಶಿ ಬೂರ್ತುಂಡು. ಅಂಚಿತ ಉಮಿ ಅಂಚಿಗ್, ಇಂಚಿದ ಉಮಿ ಇಂಚಿಗ್ ಮಲ್ತೆರ್. ಸುದ್ದೊ ಮುದ್ರಿಕೆ ಮಲ್ತೊಂಡೆರ್. ಕಾಸಿ ಕಂಬೊಲಿ ಹಾಸದೆರ್. ತರೆ ಮಿತ್ತ್ ದೇವೆರೆ ಪೆಟ್ಟೆ ಜಾಯೆರ್. ಸಾಲ್ ಪತ್ದಾದ್ ಐನ್ ಜನೊ ಕುಲ್ಯೆರ್. ಐವರೆಡ್ ಇರ್ಪೆರ್ ರಡ್ಡ್ ಒನ್ನರ ನೂಲು ಒಡ್ಡಿ ನೇವಲೊ ಜಾರಯೆರ್. ಒಂಜೆಗ್ ಸುನ್ನೊತ ಗೀಟ್ ಒಯಿತೆರ್. ಕನಕ್ದ ಮುಟ್ಟೆಗ್ ಅಡಕ್ಕಿಯೆರ್. ಬೊಲ್ಲು ಸರಾಪೆ ಆವೊಡು ಪಂಡೆರ್. ಬೊಕ್ಕೊಂಜಿ ನೂಲು ದೆತ್ತೆರ್. ಮಜಿತ್ತ ಗೀಟ್ ಒಯಿತೆರ್. ಕರಿಯ

ಸಂಕಮಲೆ ಆವೊಡು ಎಂದೆರ್. ಕನಕ್ದ ಮುಟ್ಟೆಗ್ ಅಡಕ್ಕಿಯೆರ್. "ದೇವಿ ಬತ್ದಾ ಕನಕ್ ತರ್ಕನಗ ಕರಿಯ ಸಂಕಮಲೆ ಬೊಲುದು ಸರ್ಪೆ ರಟ್ಟೆಗ್ ನಚ್ಚ ಬೆನೊಡು" ಎಂದೆರ್.

ಕಾವೆ ಪೊದೆತ್ದಾ ಜೆತ್ತೆರ್. ಆತ್ ಪೊರ್ತುಗು ದಂಡ್‌ಗ್ ಪೋತಿನಾಯೆ ಕಾಂತನೆ ಬತ್ತೆ. ತಾದಿಡೆ ಬನನಗನೆ "ಪೋಸೊಗು ದಾನೆ ಮಲ್ತಾದ" ಎಂದ್ ಕೇಂಡೆ.

"ಕಡೆತಿನ ಬಂದೊ ಉಂಡು. ಕೊಂಡು ಬತ್ತಿ ಕನಕ್ ಇದ್ದಿ" ಪಂಡ್‌ತ್ ಪಾರೊಂದು ಪೋಯಲ್. ಕನಕ್ದ ಮುಟ್ಟೆಗ್ ಪೋತ್ ಒಂಜಿ ತರ್ಕೆಲ್ ಕನಕ್ ತರ್ಕದ್ ದೆತ್ತಲ್. ಕರಿಯ ಸಂಕಬಲೆ ಬೊಲ್ಲು ಸರ್ಪೆ ಆಂಡ್. ಬಲತ ರಟ್ಟೆಗ್ ಎಡತ ರಟ್ಟೆಗ್ ನೊಚ್ಚ ಬೆನ್ನೊ.

ಕನಕ್ ದೆತ್ತ್ ಅಡಕ್ಕಿಯಲ್. ಅರಿಯ ಮುರಿಯ ಬೊಬ್ಬೆ ಕೊರೊಂದು ಪಾರೊಂದು ಬತ್ತಲ್. ಚಾವಡಿದ ತಡ್ಯಟ್ ಒಂಜಿ ಕಾರ್ ಉಲಯಿ ದೀತಲ್. ಒಂಜಿ ಕಾರ್ ಪಿದಯಿ ದೀತಲ್.

"ಏನ್ ನೆಟ್ ಬದುಕುಜಿ, ನೆಟ್ ನಾನ ಬಾಲುಜಿ" ಎಂದಲ್. ದಡ್ಡ ಮಗ್‌ರಾಯಲ್. ಕರಿಯ ನುರೆ ಕಾರಿಯಲ್. ಬೊಲಿಯ ನುರೆ ದೊಸಿಯಲ್. ಕಯ್ ಬುಡುದು ಕೈಲಾಸೊಗು, ಜೀವೊ ಬುಡುದು ವೈಕುಂಟೊಗು ಸೇರೈಲ್.

ಕಾಂತನೆ ಮಲ್ಲ ಸೇಕೊ, ಮಲ್ಲ ಸಿಂತೆ, ಮಲ್ಲ ದುಕ್ಕೊ ಬುಡೊಂದು ಕುಲ್ಲಿಯೆ. "ಎಂಕಲೆನ್ ಎಲ್ಯ ಪಿರಯೊಡು ಸಾಂಕ್ ಸಲಗ್‌ನ ಕದಿರೆ ತಲೊತ ಪುರುಸೆರ್ ಬತ್ದಾ ದೇವಿನ್ ಕೇಂಡೆರ್‌ಂಡ ದಾದ ಪನ್ನುನೆ?"

ಅಪಗ ಬಾಲೆಲು ಚಿಕ್ಕಾಯೆ ಚುವ್ವಾಯೆ ಬತ್ತೆರ್.

"ಬಾಲೆಲೆ ನಿಕ್‌ಲ್ ಎರು ಮೊಟ್ಟುನ ಪಲಯೆ ಕೊಟ್ಟಡ್‌ತ್ ಕೊಂಡೆ. ಆಯಿರೆದ ಕುಕ್ಕು ಈಯರೆದ ಪೆಲ ಕಡ್ಪಲೆ. ಅಸನಂತ ಕಂಡೊಟು ಮಸನಂತ ಕಾಟ ಕೂಟ್‌ಲೆ. ನಿಕ್‌ಲೆ ಅಪ್ಪೆನ್ ಪೊರುಲು ಮಲ್ಪಲೆ" ಎಂದ್ ದುಕ್ಕಿತೆ.

ಬಾಲೆಲ್ ಬುಲೊಂದ್ ಕೊಟ್ಟೆಗ್ ಪೋತ್ ಪಲಯಿ ಒಯಿಪ್ಪುನಗ ಸರ್ಪನಕುಲು ಸುನಿತೊಂದು ಬತ್ತೊ. ಸುಯಿತೊಂದು ಸರ್ಪೆರ್ ಬನ್ನಗ ಬಾಲೆಲ್ ಪಿರ ಬತ್ತೊ. "ಅಪಗಾಂಡ ಯಾನ್ ಪೋಪೆ. ಎಂಕ್ ಕೊಡತ್‌ದ್ ಕೆರಂಡ ಇರುವೆರೆಗ್ ಒಟ್ಟುಗು ಪೊರುಲು ಮಲ್ಪಲೆ"

"ಇನಿ ಎಲ್ಲೆಡ್ ಕದ್ರಿ ತಲೊತ ಪುರುಸೆರ್ ಬರುವೆರ್. ಬತ್ದಾ ಎಂಕಲೆನ್ ಕೇಂಡೆರ್‌ಂಡ ನಡತಿನೆನ್ ಪನಿ. ಕೋತಿ ಕಾರ್ ಬುಡಡೆ. ಎಂಕಲೆ ಬಾಲೆಲ್ ಪಂಡ್‌ಂಟ ಬುಡುದ್ ಪೋವಯೆರ್. ಇದ್ದಿಡ ಎಡ್ಡೆ ಸಾದಿ ತೋಜಾವೆರ್" ಇಂಚ ಬುದ್ಧಿ ನೀತಿ ಪಂಡ್‌ತ್ ಕಾಂತನೆ ಕೊಟ್ಟೆಗ್ ಪೋಯೆ.

ಪಲಯೆ ಒಯ್ಪುನಗ ಮಾಯಕದ ಸರೈರ್ ಮಾಯಕ ಆತೊ.

ಬಲತ ಮರ್ಗಿಲ್ ತೂನಗ ಅಯೈರ್ ಕಾವೆ ಪೊದೆತ್ ಜೆತ್ತಿನ ತೋಜುಂಡು.
"ನಿಕುಲು ಕಟ್ಟಾಯಿ ಅರಮನೆ ಈತ್ ಮಲ್ಲವು ಇಪ್ಪುನಗ, ನಿಕ್ಲಾ ದಾನೆ ಕೊಟ್ಟಡ್ ಜೆತ್ತನೆ?
ಎಂಕಲೆಡ ಪಾತೆರಂದೆ ಪೋವೊಡುಂದು ಜೆತ್ತರೊ?" ಎಂದ್ ಕೇಂಡೆ.

"ಕಾಂತನ ಎಂಕಲೆಗ್ ಅರಮನೆಲ ಒಂಜೆ, ಮರತ ಅಡಿಲ ಒಂಜೆ ತೂಲ. ನಾಲ್
ಊರು ನಾಲ್ ದೇಸೊ ತಿರ್ಗೊಂದ್ ಪೋಪಿ ಪುರುಸೆರ್" ಪಂಡೆರ್.

ಕಯ್ಯ ಪತ್ತಾದ್ ಲಕ್ಕವೊಂದು ಚಾವಡಿಗ್ ಕೊಂಡು ಪೋಯೆ. ಚಾವಡಿಟ್ ದೇವಿ
ಬೂರ್ದಿನ ಪೊರುಲು ತೂಯೆರ್.

"ದಾನೆ ಆಂಡ್ ಕಾಂತನ?"

"ದೇವಿನ್ ಜೂವೊಡು ತೂಪುನ ಬಾಗ್ಯೊ ಇದ್ದಿಯೊ ದಾನೊ. ಪುನತ್ತ ವೋನೆಡ್
ಆಂಡಲ ತೂಲೆ" ಪಂಡೆ. ವೋನೆದ ಕುಂಟು ದೆತ್ತ್ ತೋಜಾಯೆ.

"ಕಾಂತನ ಈಯಿ ದುಕ್ಕೊ ಮಲ್ಲಡ" ಪಂಡ್ ಸಿರಿಗಿಂಡೆದ ನೀರ್ ದೆತೊಂಡೆರ್.
ನಾಗದರ್ಬೆ ಮಯುರುದ ಕುಂಚ ಪತೊಂಡೆರ್. ಗಿಂಡೆದ ನೀರ್ ತಲತ್ ಮಯುರುದ ಕುಂಚೊಡು
ಈಸಿಯೆರ್.

"ದೇವಿ ಬೈದೆ, ದೇವಿ ಬೈದೆ, ದೇವಿ ಬೈದೆ" ಎಂದ್ ಲೆತ್ತೆರ್. ಕನ ಕಟ್ಟಾದ್ ಲಕ್ಕಿ
ಲೆಕೊ ಲಕ್ಕಿಯಲ್.

ಪುರುಸೆರೆನ್ ಕಾಂತನೆ ಕಲ್ಲ ಕಲೆಂಬಿಡ್ ಕುಲ್ಲಾಯೆ. ಅರಿವಾನೊ ಕೊಂಡತ್ ದೀಡ್ಯೆ.
ಐನ್ ಜನೊತ ಕಾರ್ಗ್ ಗಿಂಡ್ಯೆಟ್ ನೀರ್ ಮಯಿತ್ ದೆಕ್ಕಿಯೆರ್. ಚಾವಡಿಟ್ ಪೂತ ಆಸಿಗೆ
ಪಾಡ್ತ್ ಕೊರಿಯೆರ್. ಪೇರ್ ಪರಿಯರ ಕೊರ್ದ್ ಕಾರ್ ಒತ್ತೊನ್ದ್ ಇತ್ತೆರ್.

"ಈಯಿ ದಂಡ್ಗ್ ಪೋತ್ ಸೋತ್ದ್ ಬತ್ತಿನಾಯೆ. ಒನಸ್ ಮಲ್ದಾದ್ ಜೆಪ್ಪು
ಕಾಂತನ" ಪಂಡೆರ್. ಜಲ್ಮಂತ್ರೊಗು ಪೋಯಿಜೆ. ನಿದ್ರೆ ಬರುಪುಜಿ. ಜೆತ್ತಿನವುಲು ಅಯೈರಗುಲು
ಒಂಜಿ ಬುದ್ದಿ ಆಯೆರ್. ನಿದ್ರೆ ಬತ್ತಿಲೆಕ ಗುರೆಪ್ಪರೆಗ್ ಸುರು ಮಲ್ತೆರ್. ನಿದ್ರೆ ಬತ್ತಂಡ್
ಪಂಡತ್ ಕಾಂತನೆ ಪೊದೆಪು ಪಾಡಿಯೆ. ಉಲಯಿ ಪೋದ್ ಬುಡೆದಿಡ ಪಂಡೆ.

"ಕಾಂಡೆ ಪುರುಸೆರ್ ಪೋನಗ ನಮನ ಐಯ್ಯಲರಿ ಕೊರೊಡು. ಅಟ್ಟಿಲರೈರೆ ಮಲ್ದಾದ್,

ಒಣಸ್ ಬೋಜನೊ ಮಲ್ತ್ ಪೋವೊಡು ಪಂಡೆ. ಚೆತ್ತ್ದ್ ಮನದಾನಿ ಬೇಕ ಲಕ್ಕಿಯೆ. ಬೊಲ್ಲಿದ ತರ್ಕತ್ತಿ ಬಂಗರ್ದ ಅಂಡೆ ದೆತೊಂಡೆ. ಅಂಗಯಿ ಬಲೆ, ಮುಂಗಯಿ ಸರಪೊಲಿ ದೀಡೊಂಡೆ. ಆಗಂದ ಮಲೆಕ್ ಮೋಗಂದ ಮೂರ್ತೆಗ್ ಪೋಯೆ.

ಪುರುಸೆರ್ ಲಕ್ಕಿಯೆರ್. ಅಂಗರೆ ಕರಿಯಗ್ ಪೋಯೆರ್. ಕಯ್ಕಾರ್ ಮೋನೆ ನೆಡಿಯೊಂಡೆರ್. ನಾಮೊ ಒಯ್ಯೊಂಡೆರ್. ದಾರಂಗಿ ಪಾಡೊಂಡೆರ್. ಕತ್ತರಿ ಮುಂಡಾಸ್ ಕಟ್ಟೊಂಡೆರ್. ಎಡ ಕಯಿಟ್ ತಾಲ ತಂಬೂರಿ ಪತೊಂಡೆರ್. ಬಲತ ಕಯಿಟ್ ಅಕ್ಕಯ ಪಾತ್ರೊ ಪತೊಂಡೆರ್. ರಾಮ ವಾಕ್ಯ ಓದೊನುದು, ಹರಿ ನಾರಾಯಿನ ಪದೊ ಪಂಡೊನುದು ಜಾಲ ಮುಂದಿಲ್ಗ್ ಬತ್ತೆರ್.

ದೇವಿ ಪಾರೊನುದು ಬತ್ತಲ್. "ಎಂಕಲೆ ಆಂಜೊವು ಐಯ್ಯಲರಿ ಕೊರಿಯರ ಪನ್ನೆರ್. ಮೂಲು ಪರೆಲರಿ ಇದ್ದಿ. ದುಂಬುಗು ನಿಕ್ಲೆನ ಅಂಗ್ ಬೊಡ್ಡಿ. ನಿಕ್ಲೆಲ್ ಏಪೊಲ ಬತ್ದ್ ಕರಕರೆ ಮಲ್ಪಿಯರೆ ಆವಂದ್" ಪಂಡಲ್.

ಅಟ್ಟೊಡುದು ಒಂಜಿ ಪುಂಡಿ, ಬಲಡ್ತ್ ಒಂಜಿ ಪುಂಡಿ, ಮೂಲೆಡ್ತ್ ಒಂಜಿ ಪುಂಡಿ ಬಿಕ್ಕಿ ಕೊಂಡತ್ ಕೊರಿಯಲ್. "ಕೇನ್ನೊ ಅಪ್ಪೆ ದೇವಿ. ಪುಲ್ಯ ಕಾಂಡೆ ಈಯಿ ಕಯ್ಯೇರ್ದ್ ಕೊರಿಯ. ಪುಲ್ಯರ ಕಾಂಡೆ ಬೂರಿ ಬಿಕ್ಕಿ ಪಿರ ಕೊರ್ಪುಜಿ. ನೆನಪು ದೀಲ" ಪಂಡತ್ ಜತ್ತೊಂದ್ ಪೋಯೆರ್.

ಅಂಗರೆ ಕರಿಯಗ್ ಪೋಯೆರ್. ಬಡೆಕಯಿ ಪೋತಿ ಬಂಗ ಬಾರೆತ ಇರೆನ್ ಕಡ್ತೆರ್. ನೀರ್ದ ಮಿತ್ತ್ ದೀಯೆರ್. ಮದ್ಯೊಟು ದೇವರೆ ಪಿಟರಿ ದೀಯೆರ್. ಸುತ್ತಮುತ್ತ ಐನ್ ಮೂಲೆಟ್ ಐನ್ ಜನ ಕುಲ್ಲಿಯೆರ್. ಓಡೊ ಪೋಯಿ ಪೊರ್ಲೂಡು ಪೋಪುಂಡು. ಆತ್ ಪೊರ್ತುಗು ಮೂರ್ಯರ ಪೋಯಿನ ಕಾಂತನ ಕಯಿತ ಅಂಗ್ಯೆ ಬಲೆ ಇದ್ಯಾಂಡ್. ಮುಂಗ್ಯೆ ಸರಪೊಲಿ ಇದ್ಯಾಂಡ್. ಬೊಲ್ಲಿದ ತರ್ಕತ್ತಿ ಇದ್ಯಾಂಡ್. ಬಂಗರ್ದ ಅಂಡೆ ಇದ್ಯಾಂಡ್. ಈಂದ್ ಈಚಿಲ್ ಇದ್ಯಾಂಡ್. ಮಲೆ ಬುಲೆತ್ಂಡ್.

ಪಾರೊಂದ್ ಬತ್ತ್ ತೂಪೆ. ಬೆನ್ನಿ ಬಾರೆ ಇಜ್ಜಾಂಡ್. ಎರು ಬತ್ತ್ ಇಜ್ಜಾಂಡ್. ಇಲ್ಲ ಇಡೆ ಇಜ್ಜಾಂಡ್. "ಆಸರ್ಗ್ ದಾಲ ಕೊರ್ಲ" ಪನ್ನಗ ಅಡಿ ಕರಟ್ ತೆಲಿಲ ಇಜ್ಜಾಂಡ್. ಉನುಪುದ ಕರಟ್ ನುಪ್ಪು ಇಜ್ಜಾಂಡ್. ಪೇರ ಬಿಸಲೆಡ್ ಪೇರ್ ಇಜ್ಜಾಂಡ್. ಅಲೆ ಇಜ್ಜಾಂಡ್.

"ಈದೆ ಪುರುಸೆರ್ಗ್ ದಾನೆ ಪಂಡ, ಓಲು ಪೋಯೆರ್, ಒಲ್ಲ ಪೋಯೆರ್?" ಕೇನ್ನಗ

"ಯಾನ್ ದಾಲ ಪನ್ತಜಿ, ದಾಲ ಕೊರ್ತಜಿ. ಅಕ್ಲೆನ ಹಂಗ್ ನನ ಬೊಡ್ಡಿ ಪಂಡ್"

ಮೂಜಿ ಪುಂಡಿ ಬಿಕ್ಕಿ ಪಿರ ಕೊರಿಯೆ"

"ದೆತ್ತನ ಇಲ್ಲ. ನಿಕ್ಕೊ ಪಿರ ಕೊರಿಯರ ಕೊರ್ದಿನವಾ? ದೆತ್ತನ ಇಲ್ಲ!" ಪುರುಸೆರೆನ್
ಲೆತ್ತೊಂದು ಅಂಗರ ಕರಿಯಗ್ ಪೋಯೆ. ಪುರುಸೆರ್ ಆಯಿರೆಗ್ ಎತಾದೆರ್. ಮುಕ್ಕೋಲು
ಲೆತ್ತೆ. ಪಿರ ತಿರಾಗ್ದ್ ತೂಯೆರ್. ಪಿರ ತಿರಾಗ್ದ್ ತೂನಗ ಕಾಂತನೆ ನೀರ್ಗ್ ಲಾಗಿಯೆ.



ಪುರುಸೆರ್ ಇರೆತ ಕೊಡಿ ತಿರ್‌ಗಾದ್ ಬುಡಿಯೆರ್. ಈಯರೆಗ್ ಬತ್‌ದ್, ಏರಿ ನೀರ್ ತಗ್ಗಾದ್, ತಗ್ಗಿ ನೀರ್ ಏರಾಯೆರ್. ಕಾಂತನನ್ ಮಿತ್ತ್ ಕೊಂಡತೆರ್. ಪರಿ ನೀರ್ ಕಕ್ಕಾಯೆರ್. ಜೂವೊ ದೆತ್ತೊನುನ ದಾಯೆ ಪಂಡೆರ್.

"ನಿನಡ್‌ದ್ ಮಸ್ತ್ ಕೆಲಸೊ ಆಪಿನವುಂಡು"

"ನಿಕುಲು ಕೊರ್ತಿ ಐಸಿರ ಬಾಗ್ಯ ನಿಕುಲು ಕೊಂಡು ಪೋನಗ ಎನ್ನ ಜೀವೊ ದಾಯೆಗಾದ್?"

"ನಿಕ್ಕ ದೀವೊನುನ ಯೋಗ್ಯತೆ ಇತ್ತ್ಂಡ್. ನಿನ್ನ ಬುಡೆತಿಗ್ ದೀವೊನುನ ಯೋಗ್ಯತೆ ಇದ್ದಿಯಾಂಡ್. ಎಂಕಲೊ ಕೇಂಡ್‌ದ್ ದೆತ್ತೊನ್ನ ಅತ್ತ್. ಆಲಾದೆ ಕಯ್ಯೆರ್‌ದ್ ಕೊರ್‌ನೆ. ಪುಲ್ಯ ಕಾಂಡೆ ಬೂರಿ ಬಿಕ್ಕೆ ಪಿರ ಸಿಕ್ಕುಜಿ. ನಾನ ಪಿರ ಸಿಕ್ಕೊಂಡ ಎಲ್ಲಂಜಿ ಮಾರ್ನೆಮಿಗ್ ಕದ್ರಿ ತಲೊಕ್ ಬರಡ್. ಒಂಜಿ ಕಂದೆಲ್ ಕಲಿ ಪತ್ತೊಂದ್ ಬರಡ್. ಅಲ್ಪ ಐಸಿರ ಬಾಗ್ಯ ಕೊರ್ಪೊ" ಪಂಡೆರ್.

ಆತ್‌ನೆಟ ಕೋಡಿ ಮೂಲೆ ಅಡಿತ್‌ದ್ ಅಟ್ಟಿಲರಗನೆ ಮಲ್ತೊಂದು ಇಪ್ಪರ ಪಂಡೆರ್. ಕಾಂತನಗ್ ಸಮಾದಾನೊ ಪಂಡೆರ್. ಮಟೊ ಮಾನೊ ಸೇರೊಂಡೆರ್. ದೇವೆರೆ ಪಿಟಿರಿ ಕೊಂಡು ಪೋಯೆರ್. ದೇವೆರೆ ಪೀಟೊಡು ದೀಡಿಯೆರ್. ಮೂಜಿ ಪ್ರದಕ್ಷಿಣ ಬತ್ತೆರ್. ಸಾಷ್ಟಾಂಗ ನಮಸ್ಕಾರ ಕೊರ್ಯೆರ್.

ಆನಿದ ದಿನೊಟ್ಟು, ಸತ್ಯದಾನೆ ದಿನೊಟ್ಟು, ಮಂಡಲ ಬರಿಕೆ ದೇರನ ಬರಿ ದೇಯಿ ಬೈದೆ, ಒಂಜಿ ಕಂದೆಲ್ ಕಲಿ ತುಂಬವೊಂದು ಬತ್ತಲ್. ಕಂದೆಲ ಕಲಿ, ಗಂಗರ ಜಾಡಿ ತುಂಬವೊಂದು ಬತ್ತಲ್. ಕದಿರ ತಲೊಕು ಬತ್ತಲ್. ಬಲತ್ತ ಕಯ್ಯಾ ರಾಮನ ಕೊಂಡೆ, ಎಡತ ಕಯ್ಯಾ ಯಮನ ತೂರಿ ಪತ್ತೊಂದು ಬತ್ತಲ್. ಬೊಟ್ಟುನಡ್ಕ ಬೋರು ಪದವುಗು ಬತ್ತಲ್. ಗೋಲಿದ ನಿರೆಲ್‌ಡ್ ಗಾಲಿದ ಬರವುಗು ಸಂತೆ ಬಾಜನೊ ಜಾಪಯಲ್.

ಏಲ್ ಇರ್ಲ್ ಏಲ್ ಪಗೆಲ್ ಕಾತ್ ಕುಲ್ಯಲ್. ಸೋತ್ ಸೊರಗಿಯಲ್ ಬೈದೆತಿ. ಬೋನಿ ಸಾಜನೊ ಆತ್‌ಜಿ. ಕಟ್‌ದಿ ಬಾಯಿ ಬುಡ್ಡಾತ್‌ಜಲ್. ಆತ್ ಪೂರ್ತುಗು ಕದಿರಡ್ ಮಂಞನಾತ ದೇವೆರೆ ಬಲತ ಬಾಗೊಟು ಪುರುಸೆರ್ ತೋಜಿಯೆರ್. ಜಗನಂದ ಅಯ್ಯೆರ್ ಜೋಗಿ ಪುರುಸೆರ್ ತೋಜಿಯೆರ್. ಉದಿಪನ ಆಯೆರ್. ಮಟ ಮಾನ್ಯ ಜತ್ತೊಂಡೆರ್. ದೇವೆರೆ ಪಸ್ಕೆ ಪತ್ತೊಂಡೆರ್. ದೇವಿ ಕಲಿ ಮಾರುನಾಡೆಗೆ ಬತ್ತೆರ್.

"ಏರ್ ಅಪ್ಪೆ ಸಂತೆ ಬಾಜರೊ ದೀತ್‌ನೆ?" ಎಂದ್ ಕೇಂಡೆರ್.

"ಯಾನ್ ದೇಯಿ ಬೈದೆತಿ"

"ಎಂಕುಲು ಮಂಞನಾತ ದೇವೆರೆ ಪಸ್ಕಾನ್ ಪತೊಂದು ಬತ್ತೊ. ಮಂಞನಾತ ದೇವೆರೆ ಪಸ್ಕಾಗ್ ಆಂಡಲ ಕೊರುವನ, ಕೊರಯನ ಬೈದೆತಿ?" ಕೇಂಡೆರ್.

"ಮಂಞನಾತ ದೇವೆರೆ ಪಸ್ಕಾಗ್ ದಾಯೆ ಕೊರೊಡುಯೆ? ಬೊಟ್ಟು ಅಡ್ಕಡ್, ಬೋರು ಪದವುಡು ಗೋಲಿದ ಮರ ಕಾತಿನೆಗೊ? ಬೋನಿ ಸಾಜನ ಮಲ್ತಾಜಿ. ಕಟ್‌ದಿ ಬಾಯಿ ಬುಡ್ಡಾದ್‌ಜಿ. ರಾಮ ಕೊಂಡೆ ಮುರ್ಕಾತ್‌ಜಿ. ಬೋನಿ ಆವಂದೆ ಮಂಞನಾತ ದೇವೆರೆ ಜೋಲಿಗೆಗ್ ಯಾನ್ ಕೊರಯೆ" ಪಂಡಲ್.

"ಅಪಗಾಂಡ ಆವು ಬೈದೆತಿ. ಬೋನಿ ಮಲ್ತಾಜಂಡ ಎಂಕುಲು ದಾನೆ ಮಲ್ಪುನೆ. ಮದ್ಯಾಹ್ನದ ಪೂರ್ತು, ಬಡವುಡ ಪೂರ್ತು. ಬತ್ತ್‌ದ್ ಅಂಚನೆ ಪಿರ ಪೋಪಿನ ಕಾಲ ಬತ್ತ್‌ಂಡ್. ಆಂಡ ಮಲ್ಲೆ ಇದ್ದಿ. ಎಂಕುಲು ಸತ್ತೊದ ಪುರುಸೆರ್. ಕಟ್‌ದಿ ಬಾಯಿ ಕಟ್‌ದೇ ಇಪ್ಪಡ್. ಬೋನಿ ಮಲ್ಪಯ" ಎಂದೆರ್ ಜತ್‌ದ್ ಪೋಯೆರ್.

ತಿರ್ತ ಸಾಲ್ ಪೇಂಟೆ, ಸಂತೆ ಕಟ್ಟೆ ತಿರುಗೊನುದು ಬತ್ತೆರ್. ಸಂಜೆ ಮಂಜತ ಪೂರ್ತುಗು ಬತ್ತೆರ್.

"ಬೋನಿ ಮಲ್ತಾದನ ಬೈದೆತಿ. ನನಾಂಡಲ ಕಾನಿಗೆ ಕೊರುವನ. ಎಂಕಲೆಗ್ ಮುಟ ಮಾನ್ಯ ಸೇರುನ ಪೂರ್ತಾಂಡ್" ಪಂಡೆರ್.

"ಪುರುಸೆರೆ ಯಾನ್ ಬುಕ್ಕೊ ಬೋನಿ ಸಾಜೊ ಮಲ್ಪುವೆ. ಮಂಞನಾತ ದೇವೆರೆ ಪಸ್ತಿ ಸುರುಟು ಕೊರ್ಪೆ". ಕುಡ್ತು ಲಕ್ಕಿಯಲ್. ಕಂದೆಲ್‌ದ ಬಾಯಿ ದೆತ್ತಲ್. ಅದೊರ್ ಕಂದೆಲ್‌ದ ಕಲಿನ್ ಮಂಞನಾತ ದೇವೆರೆ ಮಂಜಗ್ ಕೊರಿಯಲ್. ಕಡೆ ಕಣ್ಣ ಕೊಡಿ ದುಕ್ಕೊ ಬುಡಿಯಲ್.

"ಮಂಜನಾತ ದೇವೆರೆ ಪಸ್ಕೆ ಕೊರ್‌ದ್ ದುಕ್ಕೊ ಬುಡಿಯನ? ಎಂಕುಲು ದೆತನೊಯೊ. ಅಸೊರ್‌ಡು ಕೊರಿಯಂಡ ಎಂಕುಲು ದೆತೊನುವೊ"

"ಪುರುಸೆರೆ ಯಾನ್ ಮಂಞನಾತ ದೇವೆರೆ ಪಸ್ಕಾಗತ್ತ್ ದುಕ್ಕೊ ಬುಡಿನೆ. ಅದೊರ್ ಕಂದೆಲ್ ಕಲಿ ಮಾರ್‌ದ್ ಯಾನ್ ಜೋಕುಲು ಬಾಲೆಲೆನ್ ಸಾಂಕುನೆ ಎಂಚಾಂದ್ ಯಾನ್ ದುಕ್ಕೊ ಮಲ್ತಿನಿ"

"ಉಂದೆ ಕಲಿ ಏಲ್ ಇರ್ಲ್ ಎಣ್‌ಮ ಪಗೆಲ್ ಮಾರಾಲ ಬೈದೆ"

"ದಾದೆನ್ ಯಾನ್ ಮಾರುನೆಯೆ. ಮೂಸವೊಂದು ಕುಲ್ಲುನೆನೊ?"

"ಸಾರ್ ಪ್ರುಡೆಕ್ ಜಪ್ಪು ಸರೆಕ್ ಮೆಯಿಕ್ ಮೀಲ. ಅಡಿಯಾರ ಮುರ್ಂಗಾಲ, ಮೇಲಾರ ನೆಗಪ್ಪುಲ, ಒಂಜಿ ಪುಂಡಿ ಬೊಲಿಯ ಉರಿಕ್ಕಿ ಪರಿತೊನು ಬಲ" ಪಂಡೆರ್.

ದುಂಬುಗು ಆಚರಿಲೆನ್ ಲೆಪುಡಾಯೆರ್. ತೆಕ್ಕಿದ ಮರ ಕಡ್ಡಾಯೆರ್. ಮೂಜಿ ಕಾರ ಮುಂಡು ಮುಕ್ಕಾಲೆ ಗೂರಯೆರ್. ದೇವಿ ಕೊಂಡತಿನ ಉರಿಕಿದ ಚೆರಿಯೆ ಬಗ್ಗೆಯೆರ್. ದೇವಿನ್ ಮೂಡಾಯಿ ಮೋನೆ ಪಾಡ್‌ದ್ ಉಂತಾಯೆರ್. ಸೂರಿಯ ಬೊಟ್ಟು ಪಾಡಾಯೆರ್. ಪಡ್ಲೊಯಿ ಮೋನೆ ಪಾಡ್‌ದ್ ಚಂದಿರ ಬೊಟ್ಟು ಒಯಿಪಾಯೆರ್. ಕಂದೆಲ್ ದೆತ್ತ ತೆರಿಯೆದ ಮಿತ್ತ ದೀಡ್ಡಾಯೆರ್. ರಾಮ ಕೊಂಡೆ ಲಚುಮನ ತೂರಿ ಕೊರಿಯೆರ್. ಪದಾರಾಡ್ ಮೊರಂಗೆದ ಜೋಲಿಗೆಗ್ ಕಯ್ ಪಾಡ್‌ತ್ ಐನ್ ಪರೆಲರಿ ದೆತ್ತೆರ್. ಮಂತಾರಿತ್ ಕಂದೆಲ್‌ಗ್ ಪಾಡ್ಡೆರ್. ಮಂಞನಾತ ದೇವೆರೆನ್ ನೆನೆತ್‌ದ್ ಒಂಜಿ ವರೊ ಕೊರಿಯೆರ್.

"ಕಡಲ್‌ಡ್ ರಾಮ ತೆರೆ ಮಗ್‌ರಾನ ಚಂದ ಮಗ್‌ರೊಡು. ಕಂಡದ ಕಾಡ್ ಕಡ್ಡಿಚಂದ, ನೀರ ಬೊಲ್ಲ ಒಡ್ಡಿ ಚಂದ ಒಡ್ಡೊಡು. ಸಾರ ಬೊಲ್ಲ ಏರಿಚಂದ ಏರೊಡು. ದಿಕ್ಕೆಲ್‌ಡ್ ಪೇರ್ ಉರಿ ಚಂದ ಉರ್ಕೊಡು. ಮಾರಿನಾತ್ ಮುಗಿಯರೆ ಆವಂದ್. ಅಲತ್ತಿನಾದ್ ಕುಂದ್ಯರೆ ಆವಂದ್. ಅಂಗತನೆ ಆಸರ್ ತನಿಪಿಯರೆ ಪುರ್ಸೊತ್ತು ಸಿಕ್ಕರೆಗ್ ಆವಂದ್. ಬಂಜಿತ ಬಡವು, ಕಣ್ಣೆತ ನಿದರೆ ಇದ್ಯಂತೆ ಪೋವೊಡು. ನಾತ ಬಾಯಿಗ್ ಬಚ್ಚಿರೆ ತಿನ್ಯರ ಪುರ್ಸೊತ್ತು ತಿಕ್ಕಿಯರೆ ಆವಂದ್" ಎಂದ್ ವರೊ ಕೊರೊರ್.

"ಮಾರಾಲ ಬೈದೆತಿ, ಮಾರಾತ್ ಸೋತಿನ ಕಾಲೊಗು ಎಂಕುಲೆನ್ ನಿನೆಪುಲ" ಪಂಡಾತ್ ಮಟಮಾನ್ಯ ಸೇರೊಂಡೆರ್.

ಮಾರ್ಪಲ್ ಬೈದೆತಿ - ಮಾರಾನಾತ್ ಮುಗಿಪ್ಪುಜಿ. ಅಲತ್ತಿನಾತ್ ತಗ್ಗುಜಿ. ಅಂಗತನೆ ಆಸರ್ ತನಿಪರೆ ಬಿಡುವು ಇದ್ದಿ. ಪೇರ್ ಉರ್ಕಾವೊಂದು ಪೋಯಿಲೆಕ್ಕ ಉರ್ಕಂಡ್. ಕಂಡೊಗು ಕಟ್ಟಿ ನೀರಾದ ಲೆಕ್ಕೊ ಎರ್ಕೊಂದು ಬತ್ತಂಡ್. ಏಲ್ ಇರ್ಲ್ ಎಣ್ಣೆ ಪಗೆಲ್ ಮಾರಾದಲ್. ಬಲತ್ತಾಗ್ ಅರಿ ಬಾರಾದ ಏಳ್ ತುಪ್ಪೆ ಕಟ್ಟಿಯಲ್. ಎಡತ್ತಾಗ್ ಏಲ್ ರಾಶಿ ದುಡ್ಡು ಪನವುದ ಕಜಾನೆ ಕಟ್ಟಾದಲ್. ಏಲ್ ಪೋತ್ ಎಣ್ಣೆನಾನಿ ಜಾಮ ಪೂರ್ತುಗು ದಾತ್ ತತ್‌ದ್ ಮುಂಡು ಮುಕಲೆದ ಅಡಿಕ್ಕ ಬೂರೊಲ್. ಪರಿಯರ ಬತ್ತಿ ಜನೊ ಲಕ್ಕಾದ್ ಬಾಜೆಲ್ ಕೊರಿಯೆರ್. ತರೆಕ್ ನೀರ್ ತಟದ್ ಬೋದೊ ಮಲ್ತೆರ್.

"ದಾನೆ ಆಂಡ್ ದೇಯಿ?" ಎಂದ್ ಕೇಂಡೆರ್.

"ಕದ್ರಿ ತಲೊತ ಜೋಗೊದ ಪುರುಸೆರ್ ಒಂಜಿ ವರೊ ಕೊರುದು ಪೋತೆರ್. ಅಕ್‌ಲ್ ಇರ್ವರ ಬತ್‌ಜೆರ್. ಬತುದುವೆರ್‌ಡ ಮಾಯಕದ ಕಲಿನ್ ಮಾಯಕನೆ ಮಲ್ಪಾತುವೆ"

ಆತ್ ಪೂರ್ತುಗು ಮಂಞನಾತ ದೇವೆರ್, ಜೋಗಿ ಪುರುಸೆರೆಗ್ ಕನಟ್ ಬತ್ತ್ ದ್ ಪಂಡೆರ್.

"ದೇವಿಗ್ ವರೊ ಕೊರ್ದ್ ಪೋತರ್. ಆಲ್ ಸೋತಲ್, ಸೊರಗ್ ದಲ್. ದಾತ್ ಬೋದ ತತ್ ದ್ ಮುಂಡು ಮುಕ್ಕಲೆದ ಅಡಿಕ್ಕಾ ಬೂರ್ದಲ್"

ಕನ್ನಗ್ ಸೊಪನ ಕಟ್ಟಾದ್ ಮನದಾನಿ ಕಾಂಡೆ ಲಕ್ಕಿಯೆರ್. ಮೆಗಿಯಲ್ಲೆನ್ ಲೆತೊಂದು ದೇವೆರೆ ಕಿರೆಕ್ ಪೋಯೆರ್. ಕಯ್ ಕಾರ್ ವೋನೆ ನೆದೊಂಡೆರ್. ನಾವೊ ಒಯೊಂಡೆರ್. ದೊರಂಗಿ ಪಾಡೊಂಡೆರ್. ಕತ್ತರಿ ಮುಂಡಾಸ್ ಕಟ್ಟೊಂಡೆರ್. ಎಡತ್ತ ಕಯ್ಯಾ ತಾಲ ತಂಬೂರಿ ಪತೊಂಡೆರ್. ಬಲತ್ತ ಕಯ್ಯಾ ಅಕ್ಷಯ ಪಾತ್ ರೊ ಪತೊಂಡೆರ್. ರಾಮ ವಾಕ್ಯ ಓದೊಂಡೆರ್. ಸಿರಿ ನಾರಾಯಣ ಪದೊನೆ ಪಂಡೊನುದು ತಿರ್ತ ಸಾಲ್ ಪೇಂಟೆಗ್ ಬತ್ತೆರ್. ಸಂತೆಕಟ್ಟೆ ತಿರುಗೊನುದು ಸಂಜ ಮಂಜದ ಪೂರ್ತುಗು ಮಿತ್ತ ಸಾಲ್ ಗ್ ಬನ್ನಗ ದೂರೊಗು ತೂಯಲ್ ದೇವಿ. ಪತ್ತ್ ಬಿರೆಲ್ ಸರಣೆಂದಲ್.

"ದಾನೆ ಆಂಡ್ ಬೈದೆತಿ? ಪರಿಯನ? ಮಾರ್ಜನ? ಮೂಸಾವೊಂದು ಗುತ್ತನ?"

"ಪುರುಸೆರೆ, ಸೋತನೆ ಯಾನ್. ಬದ್ ಕುಜಿ ನೆಟ್. ಬಾಲುಜಿ ಯಾನ್. ನಿಕ್ ಲೆ ಮಾಯಕದ ಕಲಿಯಾಂಡ ಮಾಯಕನೆ ಮಲ್ಪಲೆ. ಜೋಗೊದ ಕಲಿ ಜೋಗೊಟೆ ದೀಡ್ಲೆ" ಪಂಡೊಂಡಲ್.

"ಆತ್ ಸುಲಬೊಡು ಇದ್ದಿ ತೂಲ. ಎಚ್ಚ ಮಲ್ಪನವು ನಮ ಇಚ್ಚೆ ಅತ್. ಕಮ್ಮಿ ಮಲ್ಪನವು ನಮ ಇಚ್ಚೆ ಅತ್. ಕದ್ರಿ ತಲೊತ ಕಲಿಪರಿ ದೋಸೊಗು ದಾನೆ ಪರಕೆ ತುಂಬಾ ಬೈದೆತಿ?"

"ದಾನೆ ಪರಕೆ ಯಾನ್ ತುಂಬೊಡು?"

"ಅಪಗ ಮಂಜುನಾತ ದೇವೆರ್ ಬುದ್ದಿ ಕೊರಿ ಪರಕೆ ತುಂಬುಲ."

"ಎನ್ನವುಲು ಬಲತ ಮರ್ಗಿಲ್ ಡ್, ಏಳ್ ದಿಂಜಿನ ಅರಿ ಬಾರ್ ದ ತುಪ್ಪೆಡ್ ನಡುತ ತುಪ್ಪೆನ್ ಗಿರಿಪಾವೆ. ಕಲಸೆ ಕೋಲುಡು ಅಲಪ್ಪಾವೆ. ಆನೆಡನೆ ಒಯಿಪ್ಪಾವೆ. ಒಂಟೆಡನೆ ಪೇರಾವೆ. ಮಂಜುನಾತ ದೇವೆರೆ ಬಂಡಾರೊಗು ಪಾಡಾವೆ. ಎಡತ ಮರ್ಗಿಲ್ ಡ್ ಏಳ್ ರಾಶಿ ದುಡ್ಡು ಪಣವುದ ಕಣಜೊಡು ನಡುತ ಕಣಜನ್ ಗಿರಿಪಾವೆ. ಕಲಸೆ ಕೋಲುಡು ಅಲಪ್ಪಾವೆ. ಪುಡಯೆಡ್ ದಿಂಜಾವೆ. ಜನಮಾನಿ ಪತ್ ದ್ ಕಂಚಿಗಾರ ಕೊಟ್ಟಿಗ್ ಪೋಪೆ ಯಾನ್. ಸೊನೊಡು ಬೇಲೆ ಬೆನ್ನಾವೆ. ದೀವೊಗು ಕಂಚಿ ದೀಪಾಲೆ ನಡ್ಪಾವೆ. ಕಂಚಿನ ಕೊಳವೆ ದಪುಡವೆ. ತಾವು ತಗಡ್ ಮುಚ್ಚಾವೆ. ಏಲ್ ದಿನೊತ್ತ ಬಲಿ ಉಚ್ಚಯೊ ಕೊರ್ಪಾವೆ. ಮುತ್ತುಡು ಮುಗುಲಿ ಕುಲ್ಲಾವೆ.

ಬಂಗರಾದ ಕಲಸೊ ಏರಾವೆ. ನಾಡ್ ಕೂಡು ಪಾಡಾವೆ" ಎಂದಲ್.

"ಅಪಗಂಡ ಆವು. ಕಂದೆಲ್ ದೆರ್ತ್ ತಿರ್ತ್ ದೀಲ. ರಾಮ ಕೊಂಡೆ ಲಚ್‌ಮನ ತೂರಿ ಕಯ್ ಬುಡ್‌ಲ. ಮುಂಡು ಮುಕಲೆಡ್‌ದ್ ಲಕ್ಕಲ್" ಎಂದೆರ್. ಮೂಡಾಯಿ ಮೋನೆ ಪಾಡ್‌ದ್ ಸೂರಿಯ ಬೊಟ್ಟು ಮಾಜಾಯೆರ್. ಪಡ್ಲೊಯಿ ಮುಕುಡೊ ಪಾಡ್‌ದ್ ಚಂದ್‌ರ ನಾವೊ ಮಾಜಾಯೆರ್. ಅದೊ ಕಂದೆಲ್‌ಡ್ ಮೂಜಿ ಕುಪ್ಪಿ ಕಲಿ ಬತ್ತ್‌ದ್ ಉಂತ್‌ಂಡ್.

ಮನದಾನಿ ಕಾಂಡೆ ಲಕ್ಕಲ್. ದೇವೆರೆ ಕೆರೆಕ್ ಪೋಯಲ್. ಕಯ್, ಕಾರ್, ಮೋನೆ ದೆಕ್ಕಿಯಲ್. ಮಂಜುನಾತ ದೇವೆರೆ ಗುಂಡೊತ ಎದುರುಗು ಬತ್ತಲ್. ಪತ್ತ್ ಬಿರೆಲ್ ಕೂಟ್‌ದ್ ಸರಣೆಂದಲ್. ದೇವೆರೆ ಅಪ್ಪಣೆ ದೆತೊಂಡಲ್. ಬಲತ್ತ ಮರ್ಗಿಲ್‌ದ ಏಲ್ ರಾಶಿ ಸಿರಿ ತುಪ್ಪೆಡ್, ನಡು ತುಪ್ಪೆನ್ ಗಿರಿಪಯಲ್. ಕಲಸೆ ಕೋಲುಡು ಅಲಪ್ಪಯಲ್. ಆನೆಡ ಒಯಿಪ್ಪಯಲ್. ಒಂಟೆಡ್ ಪೇರಾಯಲ್. ಮಂಜುನಾತ ದೇವೆರೆ ಬಂಡಾರೊಗು ಒಪ್ಪಾಯಲ್. ಎಡತ್ತ ದುಡ್ಡು ಪಸವುದ ಏಲ್ ರಾಶಿ ಕಣಜೊಡು ನಡುತ ರಾಶಿನ್ ಹಿರಿಪಾಯಲ್. ಕಲಸೆ ಕೋಲುಡು ಅಲಪ್ಪಾಯಲ್. ಕಾಂಟಿಡ್ ದಿಂಜಾಯಲ್. ಜನಮಾನಿಡ ಕಂಚಿಗಾರ ಕೊಟ್ಟಿಗ್ ತುಂಬಾಯಲ್. ಕಂಚಿ ತಾಮ್ರದ ಬೇಲೆ ಬೆನ್ನಾಯಲ್. ಸೊನ್ನೆರೆ ಕೊಟ್ಟಿಗ್ ಪೋಯಲ್. ಸೊನ್ನೊದ ಬೇಲೆ ಬೆನ್ನಾಯಲ್. ಕಂಚಿ ದೀಪೊಲೆ ನಡ್ಪಾಯಲ್. ಕಂಚಿನ ಕೊಲವೆ ಜಪುಡಾಯಲ್. ತಾಮ್ರದ ತಗಡ್ ಮುಚ್ಚಾಯಲ್. ಮಂಞನಾತ ದೇವೆರೆ ಒಂಜಿ ಅಂಕಣದ ಜಲಕೊದ ಕೆದುನು ಏಲ್ ಅಂಕನ ಕಟ್ಟಿಯಲ್. ಕಂಕನೊನು ಅರಿತೊಲು. ಮಂಜುನಾತ ದೇವೆರೆ ಬಂಡಾರ ಪತೊಂಡಲ್.

ಉದ್ದಲ ಗುಡ್ಡೆಗ್ ಪೋಯಲ್. ಇಸವೆರ್ ಆಚರಿ ಬಲವೆರ್ ಆಚರಿಲೆನ್ ಲೆತೊಂದ್ ಪೋಯಲ್. ರಾಮೆ ಬೀಮೆ ಪನ್ನಿ ಬೊಲಿಯ ಕೇಪ್ಪುದ ಮರನ್ ತೂಯಲ್.

"ಏನ್ ಸತ್ತೊದ ಮಗಲ್ ಅಂದಂಟ ಮೂಜೇ ಗಡಿಟ್ ಮರ ಮಗ್‌ರೊಡು" ಪಂಡಲ್. ಮೂಜೆ ಗಡಿಟ್ ಮರ ಮಗ್‌ರಾಂಡ್. ಅಜಿಪೊ ತುಂಡು ಕಡ್‌ಪಯಲ್. ಮುಪ್ಪು ತುಂಡು ಬಾರಿಯಯೊಲು. ನಡು ತುಂಡುನು ಕಡೆಚಿಲ್‌ದ ಬೇಲೆ ಬೆನ್ನಾಯಲ್. ನೂತನೊದ ಬೇಲೆ ಬೆನ್ನಾದ್ ಐತ ಸಿಂಗಾರೊ ಮಲ್ಪಾಯಲ್. ಆನೆಡ ಒಯ್ಪಯಲ್. ಒಂಟೆದ ಪೇರಾಯಲ್.

ಸಕನದ ಬಾರಿ, ಸೊನ್ನೆದ ಕೊಂಬು, ಸರ್ವ ಬಿದ್‌ಡ್ ಒಯಿಪಾವೊಂದು ಬತ್ತಲ್. ಮಂಜುನಾತ ದೇವೆರೆ ಎದ್‌ರ್ ಗಜಮರನ್ ನಡ್ಪಾಯಲ್. ತೆನ್ನಾಯಿ ರಾಜ್ಯ ಮಂಗಳೂರು ಸೀಮೆ ಪನ್ನಾಯಲ್. ನಾಡ್ ಕೂಡು ಪಾಡಯಲ್. ಮುತ್ತುಟು ಮುಗುಲಿ ಕುಲ್ಲಾಯಲ್. ಬಂಗರನ ಕಲಸೊ ಏರಾಯಲ್. ಏಲ್ ದಿನೊತ್ತ ಬಲಿ ಉಚ್ಚಯೊ ಕೊರ್ಪಾಯಲ್. ಕಾಂಡೆದ ಉಚ್ಚಯೊಗು ಅಜಿಪ್ಪು ಬೊಂಡದ ಬೊಂಡ ಅಬಿಸೇಕೊ ಮಲ್ಪಾಯಲ್. ಮದ್ಯಾನ್ನದ ಪೂಜೆಗ್ ಲಕ್ಕ ತಾರಾಯಿ ಹಣ್ಣ್ ಕಾಯಿ ಮಲ್ಪಾಯಲ್. ಬಯ್ಯತ ಪೂತ ಪೂಜೆ ಕೊರ್‌ನಗ, "ಒಂಜಿ

ಪರಕೆ ಬಾಕಿ ಆಂಡ್" ಪಂಡೆರ್.

"ದಾದವು ಪುರುಸೆರೆ?"

"ದೇವಾಲ್ಯ ನಿನ ಪರಕೆ ಪೂರಾಂಡ್. ಈ ನಡ್‌ಪಾಯಿ ದೀಪಲ ಜಲಕನೆ ಮಲ್‌ಪೊಡು. ನಿನ ಕುಲೊಕು, ನಿನ ಜಾತಿಗ್ ಪುದರಾಂಡ ಬರೊಡು. ಜಾತಿಗ್ ವಿವರೊ ಪನ್ನಾಪೊಡು" ಎಂದೆರ್.

ದೇವೆರೆ ಅಪ್ಪನೆ ದೆತೊಂಡಲ್. ಪುರುಸೆರೆ ನುಡಿ ಗೆತೊಂಡಲ್. ಪೆಟ್ಟೆಡ್ ಪಿಂಡಿಟ್ ಮೇಲಾಯಿ ಪಿಂಡಿ ದೆತ್ತಲ್. ಅಜಿಪ್ಪ ಮೊರಂಗೆತ ಪಾಲೆ ಪಟ್ಟೆ ಸೀರೆನ್ ದೆತ್ತಲ್. ಮುಪ್ಪೊ ಮೊಳೊಕು ರಡ್ಡ್ ತುಂಡು ಮಲ್ತಲ್. ರಡ್ಡ್ ತುಂಡು ರಡ್ಡ್ ಬತ್ತಿ ಮಲ್‌ಪಾದ್ ಕಂಡನ್ನಡ ಕೊರಿಯಲ್.

"ಕಂಚಿ ದೀಪೊ ಜಲಕನೆ ಮಲ್ಪೊಡು. ನಮ ಕುಲೊಕು ನಮ ಜಾತಿಗ್ ಪುದರಂಡ ಬರೊಡು. ದುಂಬುಗು ನಮ ಕಸೊ ದೂರಾವೊಡು" ಪಂಡಲ್.

ಕಾಂತನೆ ಲಕ್ಕಿಯೆ. ಸುದೊ ಮುದ್ರಿಕೆ ಆವೊಂಡೆ. ಮಿತ ಸಿಂಗಾರ ಆವೊಂಡೆ. ಬತ್ತಿ ಪತೊಂದು ಮಂಜುನಾತ ದೇವೆರೆ ಗುಂಡದೆದಾರ್ ಬತ್ತೆ. ಪತ್ತಾ ಬಿರೆಲ್ ಸರಣೆಂದೆ. ದೇವೆರೆ ಅಪ್ಪನೆ ದೆತೊಂಡೆ. ಪುರುಸೆರೆ ನುಡಿ ದೆತೊಂಡೆ. ಕಂಚಿ ದೀಪೊದ ಮುದೆಲ್‌ಗ್ ಪೋತ್ ಉಂತಿಯೆ. ದೀಪೊದ ಕೊಡಿಡ್‌ತ್ ಕಡೆ ಮುಟ್ಟು ತೂಯೆ.

"ಎಂಕ್ ಕಂಚಿ ದೀಪೊ ತೂನಗ ಜೀವೊಡು ಪೋಡಿಗ್ ಆಪುಂಡು. ಮುಪ್ಪ ಕೋಲುದ ದೀಪೊ ತೂನಗ ಬಾರಿ ಪೋಡಿಗ್ ಆಪುಂಡು" ಪಂಡೆ.

"ತಿರ್ತ್‌ಡ್‌ತ್ ಪೊತ್ತಾವೊಂದು ಪೋವೊಡ್‌ಚಿ. ಮಿತ್‌ಡ್‌ತ್ ಪೊತ್ತಾವೊಂದು ತಿರ್ತ್ ಬಲ ಕಾಂತನ" ಎನ್ನಗ

"ಕೇಂಡರೆಯೆ ಪುರುಸೆರೆ, ಇನಿ ಮುಟ್ಟು ಎಂಕಲೆನ್ ಸಾಂಕ್ಯರ್. ಎಲ್ಯ ಪ್ರಾಯೊದ ಬಾಲೆಲೆನ್ ಸಾಂಕ್‌ದ್ ಸಲಗ್‌ದ್ ಮಲ್ಲೆ ಮಲ್ಲೆರ್. ಪೂಪೂಜನೆ ಉಪದೇಸ ಕೊರಿಯರ್. ಐಸಿರೊ ಬಾಗ್ಯ ಕೊರಾನಿಲಾ ಅಂದ್. ಮದಿಮೆ ಮಾಸಿರೊ ಮಲ್ತನೆಲ ಅಂದ್. ಇನಿ ಮುಟ್ಟು ಪಂಡಿಲೆಕ್ಕ ಎಂಕುಲು ಕೇಂಡಿನೆಲಾ ಅಂದ್. ಇನಿತ ದಿನೊಟು ಮಂಜುನಾತ ದೇವೆರ್ ಬುದ್ಧಿ ಕೊರಿಲೆಕೊ ಮಲ್ಪುವೆ ಯಾನ್" ಎಂದೆ.

ತಿರ್ತಾಡಾತ್ ಮಿತ್ತ್ ಮುಟ್ಟು ಪೂತ್ತಾವೊಂದು ಪೋಪೆ.

ತುಡರ್ದ ಏರಿ ಬೀಜಿಂಡ್. ಉಂತರೆ ನಿಲೆ ತಿಕಾಜಿ. ಜಪ್ಪರೆ ಗಡಿ ಇದ್ಯಾಂಡ್.
ಅಡಿಡಾದ್ ಸುವು ಪೂತ್ತಾನಗ "ಅಗಿನಿಡ್ ಬೂರು ಸಯ್ಪು ಕಾಲೊ ಬತ್ತಂಡ್ ಎಂಕ್. ಆನಿತ



ದಿನೊಟು ಬೀಮ ಕತ್ತಿಡ್ ಪುದರ್ ಇದ್ಯಂತೆ ಪೋತು. ಇನಿ ಸೂವುಟು ಪೊತ್ತು ಸಯಿಪ್ಪಿ ಕಾಲೊ ಬತ್ತ್ಂಡ್"

"ಕೇಂಡನೊ ಕಾಂತನ ಎಂಕುಲು ಪನ್ನಿ ದಾನೆ? ಈಯಿ ಮಲ್ತಿನಿ ದಾನೆ? ನಿನನ್ ಸೂವುಡು ಪೊತ್ತರೆ ಬುಡ್ಪುಜೊ. ಎಂಕ್ಲೊ ಮಂಜುನಾತ ದೇವರೆ ಉಳಯಿದ ಅಂಗಣೊಡು ಮಂಜುನಾತ ದೇವರೆ ಪಚ್ಚಡೆ ಸೆರಂಗ್ ಒಡ್ಡು ಪತ್ತ್ಪೊ. ಅಯಿಕ್ ಲಾಗಿಲ ಕಾಂತನ" ಪಂಡೆರ್.

"ಎಂಕ್ ಜೂವೊಡ ಬಾರಿ ಬಯ ಆಪುಂಡು. ದೇವಿ ತೋಜಾಯಿನ ಏಲ್ ಅಂಕಣದ ಕೆದುಟು ಒಂಜಿ ಅದೆನ್ ಬುಡುದು ಕೊರಾಲೆ" ಎನ್ನಗ "ಕುಸಿ ಬತ್ತಿನ ಲೆಕ ಲಾಗಿಲ ಕಾಂತನ" ಎಂದೆರ್. ಆನಿದ ದಿನೊಟು ಏಲದೆನ್ ಬುಡಿಯೆ, ಕೀಲದೆಕ್ ಮಡೆ ತುಪ್ಪೆಗ್ ಲಾಗಿಯೆ. ಮೂಜಿ ಸಾರಿ ಕಂತಾದ್ ಮೂಜಿ ಸಾರ್ ನೆಗತ್ದಾದ್, ಅಲ್ತ ಕೊಡಿ ಮರತಾಡೆಗ್ ಬತ್ದಾದ್ ಮೂಜರೆಬಾಯಿ ಕೊರಾಲೆ. ಪುರುಸೆರ್ ಪಾರೊಂದು ಬತ್ದಾದ್ "ದಾನೆಂಡ್ ಕಾಂತನ ಓಲ್ ತಾಗ್ಂಡ್" ಎಂದಾದ್ ಕೇಂಡೆರ್.

"ಎಂಕ್ ದಾಲ ತಾಗ್ದಾದೆಜಿ. ಊರಾಂಡ ಬುಲುಪುಂಡು. ಮುಲ್ತ ವರೊ ತಿರುಪತಿಡ್ ಕೊರ್ಪೆ ಯಾನ್. ತಿಮ್ಮಪ್ಪ ದೇವರೆ ಬೆರಿಸಾಯೊಗು ಒನ್ನೊ ಗೋಪುರೊ ಕಟ್ಟಾವೆ ಯಾನ್. ಒಣ ಬೆಲ್ಲೆಂದ್ ಲೆಪ್ಪಾವೆ ಯಾನ್" ಪಂಡತ್ ಮಾಯಕನೆ ಆಪೆ. ನಾಲ್ ಊರು ನಾಲ್ ದೇಸ, ನಾಲ್ ಗಂಗತ ಉಳಯಿ ತಿರ್ಗೊಂದು ಬನ್ನಗ ನಮ ಪುದರ್ ಪಂಡೊಂದ್ ಬಲೆ ಪಂಡಾದ್ ಮಾಯಕನೆ ಆತೆ. ತಿರ್ಪತಿಡ್ ಪೋತ್ ಕಾಲಬೈರವೆ ಆತ್ ಉಂತದೆ. ದೇವಿ ಕದಿರಡ್ ಮಾಯಕ ಆತ್ ಉಂತದಲ್. ಕಾಲಬದ್ರ ದೇವಿಯಾದ್ ಉಂತದಲ್.

ವಿ.ಸೂ.:- ಬೊಮ್ಮರಬೆಟ್ಟು ಅಪ್ಪು ಜೋಗಿಲ್ - ಹಿರಿಯಡ್ಕ ಇಂಬೆರೆಡ ತಾ. 27.12.82ಟ್ ಸಂಗ್ರಹ ಮಲ್ತಿನೆನ್ ಕತೆಯಾದ್ ಮುಲ್ತ ಕೊರ್ತೆ.

ಹೋರೈ ಗಾಡ್ ತುಳು ಕತೆಕುಲು

- | | | | |
|-----|--------------------------------|---|-----------------------------|
| 1. | ಕೋಟಿ - ಚೆನ್ನಯ | : | ಡಾ. ವಾಮನ ನಂದಾವರ |
| 2. | ಅಕ್ಕಿರಸು ಸಿರಿ | : | ಎ.ವಿ. ನಾವಡ |
| 3. | ಕೋಡ್ಲುಬ್ಬು | : | ಡಾ. ಸುಶೀಲಾ ಉಪಾಧ್ಯಾಯ |
| 4. | ಪರತಿ ಮಂಗನೆ | : | ಕೆ. ಲೀಲಾವತಿ |
| 5. | ಪುಳೂರ ಬಾಚೆ | : | ವೆಂಕಟರಾಜ ಪುಣಿಂಚತ್ತಾಯ |
| 6. | ಅಬ್ಬಗೆ ದಾರಗೆ | : | ಕೆ.ಜೆ. ಶೆಟ್ಟಿ ಕಡಂದಲೆ |
| 7. | ಮೂಂಕು ಸಂಬಳೊ | : | ಡಾ. ಕೆ. ಚಿನ್ನಪ್ಪ ಗೌಡ |
| 8. | ಮಗೆ ಬರವು ಕಲೆ | : | ಕನರಾಡಿ ವಾದಿರಾಜ ಭಟ್ |
| 9. | ಮಾಯಂದಾಳ್ | : | ಯಶವಂತಿ ಸುವರ್ಣ |
| 10. | ಕಲ್ಲುರ್ತಿ ಕಲ್ಲುಡೆ | : | ಅಮೃತ ಸೋಮೇಶ್ವರ |
| 11. | ಬನ್ನಾಲ್ | : | ಕ್ಯಾಥರಿನ್ ರಾಡ್ರಿಗಸ್ |
| 12. | ಮಾಮಿ ಮರ್ಮಲ್ | : | ಡಾ. ಗಣನಾಥ ಶೆಟ್ಟಿ ಎಕ್ಕಾರು |
| 13. | ಜೋಗಿ ಪುರುಸೆರ್ | : | ಕುದ್ಯಾಡಿ ವಿಶ್ವನಾಥ ರೈ |
| 14. | ಅಗೋಳಿ ಮಂಜನೆ | : | ಗಣೇಶ ಅಮೀನ್ ಸಂಕಮಾರ್ |
| 15. | ಕಣ್ಣ್ಡ್ ತೂವಂದಿನ ಕೆಬಿಟ್ ಕೇನಂದಿನ | : | ಕೆ.ಆರ್. ರೈ |
| 16. | ದೇವು ಪೂಂಚೆ | : | ಅನಂತರಾಮ ಬಂಗಾಡಿ |
| 17. | ಮಾಯೊದ ಪೊಣ್ಣು | : | ಡಿ. ಯದುಪತಿ ಗೌಡ |
| 18. | ಅಜ್ಜಿ ಕತೆಕುಲು | : | ಡಾ. ಪುರುಷೋತ್ತಮ ಬಿಳಿಮಲೆ |
| 19. | ಅಪ್ಪೊದಡೈ | : | ಮುದ್ದು ಮೂಡುಬೆಳ್ಳೆ |
| 20. | ಭೂತಾಳ ಪಾಂಡೈ | : | ಡಾ. ಪಾಲ್ವಾಡಿ ರಾಮಕೃಷ್ಣ ಆಚಾರ್ |